

Paulo Corintokāharāre ohâ mi'taka pūri niî'

A'ti pūri a'tiro weéro ohâ no'opā niisé niî'

Paulo Jesu Cristore êho peorā Corintokāharāre ohâki niîwī. Kīî ohâka terore Éfesopi niîki niîwī. Kīîta Corintokāharāre neê waropire Jesu Cristo yee kitire werê, kīîre êho peóri kurakāharā sāhakā weéki niîwī.

Tiitare kīî Jesu Cristo yee kitire bu'ê siha ni'kaka be'ro piāti wa'āro weékarō niîwī.

Toopire Judeu masa nerê wiaropi bu'êki niîwī. Kīîre toopī niigire kō'ā wīrokā'kārā niîwā. Tiitare Corintokāharā me'ra ni'kā ki'ma apé ki'ma deko tohāki niîwī (At 18.1-11).

Be'ró Corintokāharāre kīî bu'ê'kere keoró weetikā ti'ógi, a'ti pūrire ohâki niîwī. Kīî ohâ wiaro nohota āyu dutí ni'kaki niîwī. Yapatigipia Judéiakāharā pahasé kiorāre wee tamúsekāhasere, kīî basi de'ró weeáthere uúkū yapatíki niîwī.

Paulo Corintokāharāre ohâ'ke niî'

1 Yi'î Paulo, Sóstene me'ra misāre āyu dutí. Kīî kē'ra Jesu Cristore êho peógi marí akawerégi niîmi. Ô'ākī hi kīî iá'karo nohota yi'îre Jesu Cristo yee kitire werê dutigi bese kúúki niîwī. ² Yi'î a'ti pūrire misā Corintopi niirāre ohâ'. Misā Jesu Cristore êho peorā Ô'ākī hi yaa kurakāharāre ohâ'. Misā Jesu Cristo me'ra niîrā, Ô'ākī hi yarā niî'. Ô'ākī hi misāre kīî yarā niíáto niígi beséki niîwī. Niî pe'tirokāharā Jesu Cristore êho peorāre tohō beséki niîwī. Jesu Cristo niî pe'tirā kīîre êho peorā wiôgi niîmi. Tohō niikā marí wiôgi niîmi.

³ Ô'ākī hi marí paki, tohō niikā Jesu Cristo marí wiôgi misāre āyuró weeáto. Misāre āyuró ehêri pō'ratikā weeáto.

Ô'ākī hi Jesu Cristore êho peorāre wee tamúse niî'

⁴ Misā Jesu Cristore êho peorā niî yuukā, Ô'ākī hi misāre āyuró weéki niîwī. Kīî tohō weesére i'yāgi, kīîre “Áyú” niî nu'ku'. ⁵ Misā Jesu Cristo yarā niî yuukā, Ô'ākī hi misāre kīî yeékāhase niî pe'tise āyusére o'ôki niîwī. Teeré o'ôgi, misāre kīî yeére āyuró masikā weéki niîwī. Āpêrāre misā kīî yeé kitire āyuró werê turiakā weéki niîwī. ⁶ Yi'î “Cristo misāre āyuró weegísami”, niîwī. Misā kīî yarā sāhakā, yi'î niî'karo nohota wa'āwi misāre. ⁷ Tohō weérā misā Ô'ākī hi o'osére kió pe'okā'. Marí wiôgi

Jesu Cristo a'tiátehere yuú kueri kurare Ô'âkî hi misâre o'osé di'sá wee'.⁸ Kîî tutuasére misâre o'ò nu'kugisami. Kîî re êho peókâ weé nu'kugisami. Teé a'ti imí koho pe'tiká pi tohò weé du'ugisami. Tohò weérâ marí wiôgi Jesu Cristo a'tiká, bu'iri marirá niírâsa'.⁹ Ô'âkî hi kîî niî'kere keoró weemí. Kîîta misâre beséki niîwî. Kîî makí Jesu Cristo marí wiôgi me'ra âyuró niî dutigi beséki niîwî.

Paulo Corintokāharāre “A'mèri dika watítikā'ya” niî'ke niî'

¹⁰ Akawerérâ, Jesu Cristo dutiró me'ra misâre a'tiuro niigiti. Misâ ni'kâro noho wākūya. Misâ uūkūse me'ra dika watítikā'ya. E'katise me'ra a'mèri uūkūya. Ni'kâro noho wākū niisétiya.¹¹ Yi'îre Cloé wamétigo yáa wi'ikāharā misâ a'mèri i'yâ sî'ritise kitire werêwâ.¹² A'tiuro werêwâ: “Naâ niki mehêkâ di'akî wākusétiamâ”, niîwâ. Misâ a'tiuro uūkūapa'ro: “Í sâ Paulo yaa kurakāharā niî'”. Âpêrâ “Apolo yaa kurakāharā”, “Pedro yaa kurakāharā”, tohò niiká “Cristo yaa kurakāharā niî'”, niîâpa'ro. Tohò weérâ no'ó iaró wākū ma'akā'pa'ro.¹³ Tohò wākūtikā'ro iá'. Marí Cristore êho peórâ niî'. Tohò weérâ ni'kâ kurata niî'. Maríre dika waáse marí'. Yi'îre Cristo meheta niî'. Misa yé niíatehere kurúsapi wêri basatiwi. “Paulore êho peórâre wamé yee no'orosa”, niî no'oya mariwí.¹⁴ Ô'âkî hire “Áyú!” niî'. Crispo, tohò niiká Gaio di'akîre wamé yeegi, keoróta weepá.¹⁵ Yi'îre pâhará misâre wamé yeekâ, a'tiuro niî boopâ: “Paulo kîî wamé me'ra ísâre wamé yeewí”, niî boopâ. Teeré niîrâ, yi'îre êho peórâ wee boopâ. No'opiákâ teeré weetiwi.¹⁶ Estéfana yáa wi'ikāharā kē'rare wamé yeewi. Âpêrâ maa wākū nemotisa!¹⁷ Yi'îre Cristo wamé yee dutigi kūútiwî. Kîî misâre yi'riose kiti pe'ere yi'îre werê dutigi o'òo'wî. Teeré werê dutigi, masâ âyuró naâ masisé paka me'ra werê dutitiwî. Yi'îre tohò wereká maa, Cristo kurúsapi wêrisére wākūti boopâ. Masâ yi'riô no'oti boopâ.

Ô'âkî hi tutuasére, kîî masisére Cristo me'ra masí no'ò niisé niî'

¹⁸ Jesu Cristo yee kiti a'tiuro niî'. Kîî maríre yi'riô sî'rigi, kurúsapi wêriki niîwî. Teeréta Jesu Cristore êho peótirâ pekâ me'epi wa'aáhâ a'tiuro niísama kîî wêri'kere: “Tohò niî ma'akâ'ro weé!”, niísama. Marí kîî yi'riô no'okārâ pe'e maa Cristo kurúsapi wêri'ke kiti âyusé niî'. Tee kiti me'ra Ô'âkî hi tutuasére i'yâ no'ò'.¹⁹ Ô'âkî hi yee kiti ohâka pūripire a'tiuro ohâ no'okaro niîwi:

Âpêrâ “Í sâ masirá niî'”, niírâsama. Naâ tohò “Masí!” niisére pe'tiká weegíti. Naâ ti'ò masisere tuu mahâmi ni'kokî 'ti, niîki niîwî Ô'âkî hi.

²⁰ Tohò weérâ “Masí pe'okâ” niírâ mehò niírâ tohamá. Tohò niiká âpêrâre naâ wākusére bu'erâ kē'ra meharóta tohamá. A'ti imí kohokāhasere uūkū me'rírâ kē'ra meharóta tohamá. A'té, a'ti imí kohokāhase naâ “Ti'ò masí!” niisére Ô'âkî hi a'tiuro weesamí. Teeré mehò niisé waro wa'aká weesamí.²¹ Ô'âkî hi niî pe'tisere masími. Tohò weégi kîî a'ti nukúkākāharāre naâ ti'ò masíse me'ra kîîre masiká weetiki niîwî. A'tiuro pe'e iáki niîwî. Naâ Jesu Cristo yee kitire ti'órâ, naâ êho peókâ, “Naâre yi'riógiti”, niîki niîwî. Kîî re êho peótirâ pe'e tee kiti're ti'órâ, “Tohò niî ma'akâ'ro weé!”, niî wākūkārâ niîwâ.

²² Judeu masa Ô'âkî hire êho peoátoto diporo a'tiuro niísama: “Ô'âkî hi tutuaró me'ra weé i'yoká i'yâ toharâpi di'akî êho peórâti”, niísama. Judeu

masa niitirã grego masa pe'e kê'ra a'ti nukúkākāharã naã wākú me'risere êho peóma. ²³ Ì sã pūrikã Cristo kurúsapi wēri'ki yee kitire werê'. Judeu masa teeré ti'órã, ti'sátisama. Judeu masa niitirã kê'ra tee kitire ti'órã, "Tohò nií ma'akārã weemá", niísama. ²⁴ Marí Ô'ākī hi besé'kārãre no'ó Judeu masare, Judeu masa niitirãre Jesu Cristo yee kiti ni'kãro noho nií'. Marí Cristo kurúsapi wērisé me'ra a'ti'ro masí': "Ô'ākī hi tutuagí, masí yi'riagi niími", nií'. ²⁵ A'ti imí kohokāharã Ô'ākī hi weesére tohò weé ma'asere weeró noho wākūma. Nií wee! Ô'ākī hi weesé pe'eta masá masisé nemoró nií yi'ri ni'ka! Apéye Ô'ākī hi we'ékere tutuātisere weeró noho i'yāma. Nií wee! Kīi we'é'ke pe'eta masá weesé yi'rióro tutuã nemo!.

²⁶ Akawerérã, misãre Ô'ākī hi beseátoho diporopi niiséti'kere wākūya. Misã pehêterākã a'ti nukúkākāhasere masirã niíwi. Pehêterākã wiórã niíwi. Pehêterākã wiórã akawerérã niíwi. ²⁷ Kīi a'ti nukúkākāhase masirãre bopóya dutigi naã "Ti'ó masitirã niíma" niirã nohere beséki niíwi. Tohò niikã tutuarãre bopóya dutigi tutuãtirã pe'ere beséki niíwi. ²⁸ Kīi mehò niirã masá yabi no'orãre beséki niíwi. Kīi tohò weékã, wiórã mehò niirã ti'ó yã'aato niígi tohò weéki niíwi. ²⁹ Tohò weégi Ô'ākī hi i'yóropi neé ni'ki "Yi'í ãpêrã yi'rióro masí yi'ri ni'ka", nií masitisami. ³⁰ Misãre Ô'ākī hi basita Jesu Cristo yarã sãhakã weéki niíwi. Tohò niikã Cristo me'rata marí masisé kió! Kīi me'rata taha Ô'ākī hi maríre "Naã äyurã, yi'rió no'o'kãrãpi niíma", nií i'yásami. Marí kīi yarã nií'. Tohò weégi marí pekã me'epi wa'ã boo'kãrãre yi'ri wetíkã weéki niíwi. ³¹ Tohò weéro Ô'ākī hi yee kiti ohãka pūripi ohã'karo nohota nií': "Ni'ki 'Äpêrã yi'rióro nií yi'ri ni'ka" nií si'rigi, niítikã'ato. Tohò niíro noho o'ógi, marí wiógi pe'ere 'Tutuã yi'rigi niími, maríre äyú butia'ro weéki niíwi', niíato", nií ohã no'okaro niíwi.

Cristo kurúsapi wēri'ke kiti nií'

2 Yi'í misã tiropi Ô'ākī hi yee kitire werêgi ehãgi, a'ti'ro weewí. Pakasé uúkūse di'la me'ra masá naã masisé me'ra werêtiwi. ² Yi'í misã tiropi niígi, a'té di'akĩre wākú niriwi: "Jesu Cristo yee kiti, tohò niikã kīi kurúsapi wēri'ke di'akĩre werêgiti", nií wākūwi. ³ Yi'í misã tiropi niígi, mehò niígi ti'ó yã'awi. Apé tero yi'í tee kitire keoró werêti boosa' niígi, nara sãákükãti. ⁴⁻⁵ Yi'í misãre êho peókã iãgi, masirã uúkū wiase me'ra uúkūtiwi. Ô'ākī hi tutuasé, kīi masisé o'osé me'ra êho peoató niígi uúkūwi. Teeré uúkūgi, Ô'ākī hi tutuaró me'ra, Espírito Santo me'ra pe'e êho peókã weewí. Misãre masá wākú wiaro noho ti'ó êho peókã iatiwi. Tohò weégi tohò werêwi.

Ô'ākī hi kīi re masiáto niígi Espírito Santore o'ò'ke nií'

⁶ Tohò niímirã, apé terore ì sã a'ti'ro weé'. Jesu Cristore äyuró êho peorã maa pakasé masisé paka me'ra werê'. Teé masisé paka a'ti nukúkākāhase meheta nií'. Tohò niikã wiórã a'ti nukúkākāharã yee meheta nií'. Naã masisé maatã pe'tirósã. ⁷ Ì sã a'teré uúkūrã, Ô'ākī hi yee pe'ere uúkūrã weé'. Kīi masisére, masí no'oya marimí'kere, masá neé waro ti'ot'kere uúkū'. A'ti nukúkã weeátoho diporo Ô'ākī hi teé ya'yio'kere "A'ti'ro weegiti", nií wākū yuu tohaki niíwi. Maríre yi'rióatehere, marí i'mísepi nií nu'kuatehere wākū yuuki niíwi. Teeréta uúkū'. ⁸ Neé ni'ki a'ti nukúkākī hi wiógi a'teré ti'ó masítiki niíwi. Ti'ó masirã pūrikã, Jesu Cristo marí wiógi äyú yi'riagire kurúsapi wêhetí boopã. ⁹ Ô'ākī hi yee kiti ohãka pūripire a'ti'ro pe'e ohã no'o':

Ô'âkî hi kîî re ma'irâre âyusé apo yuúki niîwî. Naâ î'yâti'ke, naâ ti'otî'ke niî'. Naâ neê kâ'ró wâkú ma'ati'ke niî', niî ohâ no'o'.¹⁰ Teé âyusé marî masiti'kere Ô'âkî hi Espírito Santo me'ra marîre masiká weemí. Espírito Santo niî pe'tise diâsa yi'ri ni'kasere Ô'âkî hi kîî weesére masí pe'okâ'mi.

¹¹ Marî âpi kîî wâkusére masí wee'. Kîî se'saro kîî wâkusére ti'ó yâ'asami. A'té weeró noho Espírito Santo se'saro Ô'âkî hi kîî wâkusére masími. ¹² Marî a'ti imí kohokâharâ Jesu Cristore êho peótirâ weeró noho wâkú wee'. Ô'âkî hi marîre Espírito Santore o'ôki niîwî. Tohó weerá kîî weeró noho wâkusé kió'. Kîî me'ra niî pe'tise Ô'âkî hi marîre o'ô'kere masí'. ¹³ Îsâ a'teré uúkûrâ, Espírito Santo bu'ê'ke iseri me'ra uúkû'. Îsâ basi masí mihatî'ke me'ra meheta uúkû'. Tohó weerá îsâ Espírito Santore kiorá kîî re kioráreta bu'ê'.

¹⁴ Espírito Santore moogí a'tîro weesamí. Ô'âkî hi yeekâhasere, Espírito Santo bu'esére iatisami. “Tohó niî ma'akâ'ro wee’”, niîsami. Espírito Santo me'ra marî Ô'âkî hi yeere masí'. Tohó weégi kîî re moogí Ô'âkî hi yeere “Tohó niîro wee’”, niî ti'o masítisami. ¹⁵ Espírito Santore kiogí pe'e niî pe'tise bu'esére “Keoró niîti?” niî bese masí pe'okâ'sami. A'tîro weegíre Espírito Santore moogí pe'e kîî weesére bese masítisami. ¹⁶ Ô'âkî hi yee kiti ohâka pûripî a'tîro ohâ no'okaro niîwi: “Neê ni'kí marî wiôgi wâkusére masítisami. Neê Ô'âkî hire “Tohó iá’”, niî dutí masítisami”, niî ohâ no'okaro niîwi. Tohó niîmikâ, marî pe'e Cristo me'ra niîrâ, kîî wâkusére masí'.

Paulo “Îsâ Ô'âkî hire da'rá ko'terâ niî’” niisê niî'

3 Akawerérâ, misâ Espírito Santore âyuró yi'tirâ weeró noho niîtiwi. Tohó weégi misâre diâsasere werê masitiwi. A'tîro pe'e weewí. Misâre diâsatisê di'akîre werêwi. A'ti nukúkâkâharâ Espírito Santo moorâ weeró noho niî yuukâ, tohó weewí. Misâ Cristo yeekâhasere âyuró êho peótiwi. Tohó weégi misâre wi'marâre uúkûgi weeró noho werêwi. ² Wi'marâ a'tîro weesamá. Ôpêri mi'rî du'utîrâ, ôpekó di'akî mi'risamá. Naâre ba'asére ekatísama. Bu'esé ba'asé ekasé weeró noho niî', niî si'rîro wee'. Wi'marâre ôpekó mi'óro weeró noho misâre a'tîro weewí. Misâre diâsatisê bu'îkâhasere bu'ê wâ'kowi. Yi'î misâre diâsasere bu'ekâ maa, masí pôo tēóti boopâ. Meharóta ni'kâroakare yi'î diâsasere bu'ekâ, ti'otî boosa'. ³ Misâ Jesu Cristore êho peótirâ weeró noho niî' yuhûpi. Misâ a'mêri ió'. A'mêri î'yâ si'rî wee'. Tohó weerá Jesu Cristore êho peótirâ a'ti nukúkâkâharâ weeró noho wee'. ⁴ Misâ a'tîro uúkûsa': “Yi'î Paulo yaa kurakî hi niî'”. Âpi “Yi'î Apolo yaa kurakî hi niî'”, niîsa'. Tohó niîrâ, a'ti nukúkâkâharâ weeró noho uúkûrâ wee'.

⁵ Yi'î, Apolo me'ra îsâ mehó niîrá niî'. Ô'âkî hire da'rá wâ'ya ko'terâ niî'. Tohó weerá îsâre “Naa yaá kurakâharâ niî'”, niîtikâ'ya. Îsâ weresé me'ra misâ marî wiôgi Jesu Cristore êho peówi. Îsâ niki Ô'âkî hi werê duti'kere werêwi. ⁶ Yi'î neê waro misâre werê wâ'kowi. Ni'kí otegi weeró noho weewí. Be'ró Apolo misâre bu'ê nemo peoki niîwî. Otesére akó piô'ki weeró noho weéki niîwî. Ô'âkî hi pe'e teeré pi'rî bikiâ mihaká weéki niîwî. Teeré tohó weégi, misâre nemoró êho peókâ weéki niîwî. Nemoró kîî iaró weeká weéki niîwî. ⁷ Otegi, tohó niiká akó piogí mehó niîrá niîma. Ô'âkî hi pûrikâ teeré pi'riká weegí niîmi. ⁸ Weré mi'ta'ki, be'ró kîî re bu'ê siru tuugi kē'ra ni'kâro noho niîma. Ô'âkî hi naâ nikire keoró naâ weé'kere

wapa yeégisami. ⁹Īsâ Ô'âkî hi yarã nîf'. Kîîre ni'kâro noho da'rá ko'te'. Misâ kîî da'rari d'ita weeró noho nîf'.

Tohó niiká wi'í kîî yeé ni'kari wi'í weeró noho nîf'. ¹⁰Yi'í Ô'âkî hi wee tamúse me'ra misâre bu'êgi, a'tîro weewí. Wi'í ni'kó me'rigi weeró noho misâre äyuró bu'ê ni'kawi. Apêrã misâre bu'ê nemorã, tíi wi'ire wee turiã miharã weeró noho weérã weemã. Tíi wi'ire wee yapá da'reo s'irirã, äyuró weeró iã'. ¹¹Ô'âkî hi masaré yi'rió dutigi Jesu Cristore kûûki niîwî. Kîî ni'kitã masaré yi'riógi niîmi. Yi'í misâre tee kitire bu'ê ni'kawi. Neé äpí, Ô'âkî hi tohó kûû ni'ka'ke Jesu Cristo yee kitire dika yuú masitisami. ¹²Wi'iré weérã, a'tîro weé no'o'. Ouro, prata noho me'ra, îtã peeri wapa bihîse me'ra yeé bu'i peo no'o'. Äpêrã yukí me'ra, pûrî me'ra, äripagí me'ra wee masí no'o'. A'té weeró noho ni'kí äyusé warore misâre bu'ê boosami. Äpí mehó niisé maatã pe'tisere bu'ê boosami. ¹³A'ti imí koho pe'tiká, Ô'âkî hi naã nikire naã bu'ê'kere bahú yoaropi besegísami. Ni'kí ourore pekã me'epi beségi weeró noho weegísami. Naã äyuró ou yã'aro bu'êpari? niigi, tohó weegísami. ¹⁴Ni'kí äpêrãre äyuró bu'ê turia miha'ke niî nu'kukã'rosa'. Ni'kã wi'í îtã wapa bihîse me'ra weéka wi'í îhî tiro weeró noho niî nu'kurosa'. Ô'âkî hi kîî da'rá'kere wapa yeégisami. ¹⁵Äpí äyuró bu'ê turia wã'katigi pe'ere kîî bu'ê'ke pe'tiã wa'ãrosa'. Pûrî me'ra weéka wi'í weeró noho îhî diha wa'ãrosa'. Kîî tíi wi'í îhirí kura du'ti wi'há'kí weeró noho niigísami. Kîî yeé niî pe'tise îhî pe'tia wa'ãrosa'. Kîî ni'kitã pekã me'epi wa'ã boo'ki yi'ri wetígisami.

¹⁶Misã masí weeti? Misã Ô'âkî hi wi'í weeró noho niîf'. Espírito Santo misãpire niîmi. ¹⁷Misâre “Ô'âkî hi wi'í weeró noho niîf'” niîro, kîî yarã waro niîf', niî s'iriro weé'. Tohó weégi Ô'âkî hi kîî yarãre dohöré'kã weegíre pekã me'epi bu'iri da'rêgisami.

¹⁸Misã basi a'tîro wãkú ma'atikã'ya: “Yi'í a'ti imí kohokãharã wãkú wiaro weeró noho masí yi'ria”, niitikã'ya. A'tîro pe'e niíya. “Neé masítisa”, niíya. Tohó uúkúgi pûrikãre Ô'âkî hi masigí waro wa'akã weegísami. ¹⁹A'ti imí kohokãharã naã “Tì'o masí!” niisé Ô'âkî hi î'yóropire tohó niî ma'ase niîf'. Ô'âkî hi yee kiti ohãka pûripi a'tîro niî ohã no'okaro niîwi: “A'ti nukúkãkãharã naã masisé me'ra ‘Weerã tí’ niirãre Ô'âkî hi naã wãkusere tuu mahãmi ni'kokã'sami”, niî ohã no'okaro niíwi. ²⁰Apêropi kê'rare Ô'âkî hi yee kiti ohãka pûripi a'tîro ohã nemo no'okaro niíwi: “Marí wiôgi a'ti imí kohokãharã wãkusere masími. Naã masisére î'yãgi, ‘Mehó niisé niîf’, niísami”, niî ohã no'okaro niíwi. ²¹Tohó weérã misâre bu'egíre “Äpêrã yi'rióro niîmi”, niitikã'ya. “Yi'í Paulo yaa kurakí hi niîf'”, niitikã'ya. Ô'âkî hi misâre äyuró wa'akã iãgi, a'tîro weéki niîwî. Niî pe'tisere o'ôki niíwî. ²²Yi'íre, Apolore, Pedrore misâre wee tamú dutigi o'ôo'ki niíwî. Tohó niiká a'ti nukúkãkãhasere, marí katisere o'ôki niíwî. Apêye, wërîka be'ro katí nu'kuatehere o'ôki niíwî. Niî pe'tise misa yeé niîf'. ²³Apêye kê'rare misã Cristo yarã niîf'. Tohó niiká Cristo kê'ra Ô'âkî hi yagi niîmi.

Jesu Cristo yee kitire wererã naã weeséti'ke niîf'

4 Īsãre misã a'tîro wãkuró iã'. “Cristore da'rá wã'ya ko'terã niíma”, niiró iã'. Īsã Ô'âkî hi yee kiti too dipórokãharã masíti'kere weré ko'terã niîf'. ²Marí da'rasé kiórã, marí wiôgi dutí'karo nohota keoró weeró iã'. Tohó weeká, maríre êho peósami. ³Misã yi'íre “Paulo Ô'âkî hi yeekãhasere äyuró da'ramí” niikã ou niitikã, neé wãkú ke'ti wee'. Meharóta wiórã

naâ bese wiáropi miáakã kê'rare, wākû ke'ti wee'. Yi'fí basi kê'ra besé wee'. ⁴Yi'fí da'rasére yā'áro tí'ó yā'atisa'. Tohó niímigi, “Teé áyú níi’”, níi masitisa'. Marí wiôgi dí'akí yi'fí weesére besesami. ⁵Tohó weérã âpêrã weé'kere bese yúútikã'ya. Marí wiôgire yuú kueya. Kíî a'tígi, níi pe'tise masá masítí'ke ya'yióropi níi'kere bahúré'gisami. Masá naâ wākurópi “A'tíro weegítí” níi'ke kê'rare i'yogísami. Tii níimí níiká Ô'ákí hi naâ níki áyuró weeséti'kere “Keoró áyuró weewí”, níigisami.

⁶Akawerérã, áyusére misãre ia sãá'. Tohó weégi Apolo, yi'fí, ísa yeékãhase me'ra misãre wereápi. Ísã weeró noho ní'kãro me'ra níiató níirã tohó weeápi. Ísã weesére i'ya kúuya. Tohó weérã, misã Ô'ákí hi yee kiti ohãka pûripí níiro nohota weerãsa'. Tii pûripí dutítise nohore yi'rió kehosome. Tohó níiká “Ísãre bu'egí pe'e masí yi'ri ní'kami misãre bu'egí yi'rióro”, níisome.

⁷Misã âpêrã nemoró áyurá níi wee'. Masí yi'ri ní'karã níi wee'. Níi pe'tise misã kiosé Ô'ákí hi o'ò'ke dí'akí níi'. Kíî o'òka be'ro níimikã, too pûríkãre de'ró weérã misã basi boká'karo weeró noho tí'ó yā'ati? ⁸Misã a'tíro wākû: “Níi pe'tise kíó pe'okã', yē'e nohó dí'sá wee'”, níisa'. Ísã toopí níitiri kura misã wiôrã masí yi'ri ní'karã weeró noho tí'ó yā'asa'. “Níi pe'tise masí pe'okã'”, níisa'. Tohó níirã, ísãre wee tamúro iatírã weeró noho níirã weésa'. Misã diakí háta wiôrã níiká pûríkãre, áyú yi'ria boosa'. Ísã kê'ra misã me'ra wiôrã níi tamu boosa'. ⁹Yi'fí a'tíro pe'e tí'ó yā'a'. Ô'ákí hi ísãre Jesu Cristo bese kúú'kãrãre níi pe'tírã dokapi mehó níirã kúú'karo weeró noho tí'ó yā'a'. Ísã wêhé kô'a no'ohã weeró noho níi'. Níi pe'tírã, a'tí dí'takãharã, ímî sekãharã ísã pí'etíkã i'yásama. ¹⁰Cristo yee kitire werekã, a'tí nukúkãkãharã ísãre “Tí'ó masítírã níima”, níisama. Misã pe'e “Cristo yee kitire masí pe'okã'”, níisa'. Ísã misã i'yakã ta, tutuá wee'. Misã pûrikã “Ísã tutuarã níi’”, níisa'. Masá ísãre mehó níirã weeró noho i'yákã'ma. Misã pe'ere wio pesáse me'ra i'yásama. ¹¹Neê waropita ísã pí'etí ní'kawi. Ní'kãroakã kê'rare tohóta yapatíkã'. Íhá boã', ako wió', su'tí moó'. Masá ísãre tãrapéma. Wi'fí ísa yaá wi'i waro moó'. ¹²Ísã ba'ã sí'rise nohore, ísã su'tí sãyã sí'rise nohore duú sí'rirã, a'tíro weé'. Ísã basi ípítí da'rá pí'etí'. Masá ísãre yā'áro uúkükã, naãre ísã pe'e “Áyuró wa'aáto”, níi sêri basá'. Ísãre yā'áro weekã, tohó tí'ó yā'akã'.

¹³Masá ísãre yā'áro uúkükã, naãre áyuró me'ra apó me'rikã'. A'ti ímí kohokãhase naã kô'ã'ke, naã íatísere weeró noho ísãre i'yãma. Neê waropi tohó yabí ní'ka'kãrã meharóta yabí nu'kuma taha. ¹⁴Misãre bopôya dutígi meheta ohã'. Misãre ma'ígi, yi'fí pô'rare weeró noho keoró wākukã íági weré me'rikã'.

¹⁵Misã pâharã piámukãsetiri mil Cristo yee kitire bu'erã kio masí'. Tohó pâharã kiotá basiómikã, ní'kitá níisami misãre weré mí'ta'ki. Teé Jesu Cristo masaré yi'riógi a'tíki níiwí níisé kitire yi'fita weré mí'tawi. Misã tee kitíre tí'órã, kíîre êho peó ní'kawi. Tohó weégi yi'fí misã paki weeró noho níi'. Misã kê'ra yi'fí pô'ra weeró noho níi'. ¹⁶Tohó weégi misãre a'tíro weekã íá'. Yi'fí weesétisere i'ya kúu wee sirú tuuya. ¹⁷Yi'fí teeré ia sããgi, Timóteore misã tiropi o'òo'gi weé'. Kíîre ma'í'. Kíî yi'fí maki weeró noho níimi. Marí wiôgi yeere keoró weé nu'kumi. Yi'fí Cristore êho peógi weesétisere kíî misãre werégisami. Yi'fí níi pe'tírã Cristore êho peórãre, níi pe'tiropi níirãre weré'ke nohoreta werégisami. ¹⁸Ní'karérã misã a'tíro wākúsa': “Ísã âpêrã nemoró áyuró weé yi'ri ní'ka'”, níisa'. Teeré níirã, “Paulo a'tísome”, níi wākúsa'.

¹⁹Yi'í pe'e "Ô'âkî hi iaká, maatá misâ tiropi wa'âgiti", ni' wâkû!. "Toopí wa'âgi, naâ tohò ni' uukûrãre i'yâgiti", ni'!. Teé se'sarore i'yâsome. "Naâ Ô'âkî hi tutuasé me'ra weetí naa? ni' i'yâgiti", ni'!. ²⁰Ô'âkî hi wiôgi niisé a'tíro ni'!. Kîi iaró, kîi tutuaró me'ra weeká iamí. Uúkûse iseri me'ra di'akî yi'tiká iatími. ²¹Yé'eré iasarí misa? Yi'í misâ tiropi wa'âgi, yâ'âro weesé wapa misâre tu'tiká iasarí? Ou âyuró weesé wapa pe'e ma'isé me'ra werê me'riká iasarí nee?

Yâ'âro weegíre kô'â wíro dutise nií'

5 Misa yeé kiti a'topí bisí tio!. Teeré ti'ógi, ti'o mariáwi. A'tíro ti'ó!. Ni'kí misâ me'rakî hi kîi pakí niórê'kore e'mâ, nimôtiapi!. Tohò weesére Ô'âkî hire êho peotírãpita neé weetíma. Yâ'â yi'ria!. ²Misâ "Âpêrã nemoró âyuró weé yi'ri ni'ka!", ni'ti yuhûpi? Bihâ wetiro noho o'ôrã, misâ bihâ wetitiapa'ro. Bihâ wetirá pûriká, kîi re kô'â boopã. Misâ me'ra nerê nemo dutiti boopã. ³Yi'í a'topí niímigi, yi'í wâkusé me'ra misâ tiropi niígi weeró noho ti'ó yâ'â!. Tohò weégi kîi yâ'âro weegíre misâ me'ra niígíre "Kô'aró iá!", ni' toha!. ⁴Marí wiôgi Jesu Cristo dutiró me'ra misâre nerê duti!. Yi'í kê'ra yi'í wâkusépi misâ tiropi ni' tamugiti. Marí wiôgi Jesu kê'ra kîi tutuasé me'ra misâ tiropi niígisami. ⁵Misâ tohò nerêrã, pakí niórê'kore nimôtigíre kô'âkã'ya. Wâtí kîi ipiré de'ró weé sî'rigi weeáto niírá tohò du'úkã'ya. Tohò weeká, kîi ipí pi'etírosa!. Tohò pi'etígi, kîi yâ'âro weesére du'u bodõsami. Kîi tohò weéka be'ro marí wiôgi Jesu a'ti nukúkãpi a'tígi, kîi re yi'riógisami.

⁶Yâ'âro weegí misâ wa'teropi niísami. Tohò weerã "Ísã pe'e âpêrã yi'rióro âyuró weé yi'ri ni'ka!", ni'tikã'ya. Yâ'âro weesére ni' pe'tirá pê'ri peháta wió ni'!. Misâ a'tíro ni' wiasere masí weeti? "Pãú weerã bikiáto niírá fermento wamêtisere moresamá. Naâ kã'roákã moremíkã teé ni' pe'tiropi se'sãa wa'ása!", ni' no'o!. A'té weeró noho masã naâ yâ'âro weesére pê'ri pehá wa'ásama. ⁷Tohò weerã pê'ri pehári niírá, teé yâ'asé dohórê'sere kô'âkã'ya. Teeré kô'arã, misâ âyurá toharãsa!. Judeu masa Páscoa bosé nimi díporo pãú bikiasé me'ra moré'kere kô'ásama. Ti' bosé nimire moreyá marisé di'akíre ba'ásama. Teé weeró noho misâ a'tíro weerãsa!. Yâ'asé dohórê'sere kô'arã, pãú moreyá marisé weeró noho toharãsa!. Âyurá toharãsa! niitiro maa, âyurá ni' toha!. Cristo kîi basita marí yâ'âro weesére kô'âgi wêhé no'o tohaki niíwi. Kîi Páscoa niiká ovelha naâ wêhé'ki weeró noho niími. ⁸Tohò weerã too díporo yâ'âro weeséti'kere du'uró iá!. Diakí hí wee soóro mariró weesétiro iá!. Yâ'âro weesétiro mariró niiró iá!.

⁹Yi'í too díporo ohã mi'taka pûripi a'tíro ohãwi. "Numiãre a'me tãrá baha ke'atirã me'ra ba'pãtitikã'ya", ni' ohãwi. ¹⁰Yi'í tohò ohãgi, "A'ti nukúkãhãrãre ba'pãtiti butia'kã'ya", niígi meheta weewí. A'ti nukúkãpire no'ó iaró weerã niíma. A'me tãrãrã, iãri pehase bikirã, yahará, Ô'âkî hi mehereta êho peorã niíma. Yi'í tohò ni' butia'ka be'ro niikã maa, misâ no'ó wa'ãrã wa'ã boopã. ¹¹Yi'í a'tíro pe'e niíwi: "No'ó 'Jesu Cristore êho peó" niímigi, yâ'âro weegí me'ra ba'pãtitikã'ya. A'me tãrági nohore, iãri pehagi nohore, no'ó masã naâ ye'kãrãre êho peó ma'agi nohore ba'pãtitikã'ya. Tohò niikã yâ'âro tu'tisé pihagire, ke'asé bikire, yahagíre neé ba'pãtitikã'ya. Neé kã'ró naâ 'Jesu Cristore êho peó' niímirã, yâ'âro weerã me'ra ba'ãtikã'ya", niíwi. ¹²⁻¹³Yi'í Jesu Cristore êho peotírãre bu'fri da'rê wee!. Ô'âkî hi kîi basi naãre bu'fri da'rêgisami.

Misâ pürikâ misâ me'ra niirâre naâ yâ'âro weeká, bu'firi da'rêya. Ô'âkî hi yee kiti ohâka püripi ohâ'karo nohota weeyá. A'tîro ohâ no'okaro niíwi: "Ni'kí misâ wa'tero niigi yâ'âro weegíre kô'â wiroya", niíwi. Tohò weerá kîîre kô'âkâ'ya.

**Jesu Cristore êho peórâre mehêkâ wa'aká,
werê sâatirâta a'mêri apoyá niisé nií'**

6 Jesu Cristore êho peórâ naâ me'rakâharâ me'ra uarâ noho a'tîro weesamá. Bese'ri masa Jesu Cristore êho peótirâ tiropi bese dutirâ wa'âsama. Tohò weetíkâ'ro iá'. Misâ me'rakâharâ Jesu Cristore êho peórâre bese dutíro iá'. ²Misâ masísa'. A'ti nukúkâ pe'tíka be'ro Jesu Cristo yarâ a'ti nukúkâkâharâre beserâsama. Misâ a'ti nukúkâkâharâre beserâsama niirâ, too püríkâre de'rô weerá a'teákâre bese masí weeti? ³Misâ masí weeti? A'ti imí koho pe'tíkâ, marí Ô'âkî hire werê ko'terâ i'mî sepi niími'kârâ kê're bese beserâsa'. Tohò beserâsa' niirâ, a'ti imí kohokâhase misâ di'sâ soo'ke maa tâhása'. ⁴A'ti imí kohokâhase mehò niisé me'ra misâ a'mêri uâ'. Teeákâ me'ra uârâ, a'tîro weé'. Misâ beserí masare "Mehò niirâ noho niíma" niímirâ, naâ tiropi bese dutirâ wa'â'. ⁵A'té maa misâre bopóyato niígi tohò nií'. Misâ wa'teropire neê ni'kí masígi noho a'teré beseákíhi marí butia'ti?

⁶Niiká maa, kîîre bese dutíro noho o'ôrá, Jesu Cristore êho peótirâ tiro pe'e misâ me'rakâharâre werê sâarâ wa'â'. Tohò weeká áyú niíti misâre? ⁷Misâ basi a'mêri uârâ, tohò weé ma'akârâ weé'. Misâre yâ'âro weesére tohò tí'ó yâ'akâ, nemoró áyu boósa'. Naâre werê sâaro noho o'ôrá, naâ yahasére ya'yió sâarâ, tohò tí'ó yâ'akâ'ya. ⁸Misâ basita Jesu Cristore êho peórâ misâ akawerêre yâ'âro weé'. Naa yeere yahása'.

⁹Misâ masí weeti? Yâ'âro weerá Ô'âkî hi tiropi wa'âsome. Misâ no'ó iaró wâkú ma'atikâ'ya. A'tîro weesétirâ, i'mîsepire wa'âsome. Ma'mâ piha no'ó iaró a'me târá baha ke'atirâ noho wa'âsome. No'ó masá naâ yeé'kârâre êho peórâ noho wa'âsome. Nimôtirâ, marâpitirâ âpêrâre a'me târá baha ke'atirâ noho wa'âsome. No'ó imiá basi yâ'âro weerâ noho, numiâ basi yâ'âro weerâ noho i'mîsepi wa'âsome. ¹⁰Tohò niiká yahará, iâri pehase bikirâ noho, ke'asé bikirâ, tu'tisé piharâ, wee soóse me'ra yahará Ô'âkî hi tiropi wa'âsome. ¹¹Too dipóopire misâ ni'karerâ a'teré tohóta weesétikârâ niíwi. Ni'kâroakâre akobohó, dika yuú no'o'kârâpi nií'. Ô'âkî hi yarâ nií'. Marí wiógi Jesu me'ra, tohò niiká Espírito Santo me'ra Ô'âkî hi misâre "Áyurâ niíma", nií i'yâsami.

Marí ipí Cristo yaa ipi nií' niisé nií'

¹²Masá a'tîro uúkú wiasama: "Marí weé sî'risere no'ó iaró wee masí'." Tohóta nií', niíro pe'ea'. Apêye marí weé sî'rise maríre wee tamútisa'. Marí iaró weégi weé' niígi, teeré tohò weé wâlyatikâ'ro iá'. ¹³Apêye naâ uúkú wiase diakí hí nií'. A'tîro nií': "Ba'asé áyú nií' paágare. Paâga pe'e ba'â sâakaha nií'." Ô'âkî hi pe'e a'té piáropire pe'tíkâ weegísami. Apêye pe'e diakí hí nií wee'. Ô'âkî hi ipí weégi, a'me târá baha ke'atiatihi ipire weetíki niíwi. Mari yaá ipi Jesu Cristo iaró weeátíhi ipi nií'. Kîî tii ipí wiógi niími. ¹⁴Ô'âkî hi kîî tutuaró me'ra marí wiógi yaa ipire masóki niíwi. Kîîre masó'karo nohota marí ipiré masogísami.

¹⁵Misâ masí weeti? Misa yaá ipi, Cristo yaa ipi me'ra a'mé si'a'. Marí tohò nií' niirâ, Cristo yaa ipire a'tîro weetá basió wee'. A'me târá wapá

ta'ago yaa ipi me'ra tii ipíre a'mé si'ota basió wee'. ¹⁶Masí weeti? Ô'âkî hi yee kiti ohâka pûrîpi a'tîro ohâ no'okaro niîwi: "Ímí, numiô me'ra niîgi, naâ piará niîmirá, ni'ká ipi weeró noho tohasamá", niî ohâ no'okaro niîwi. Tohó weerá misâ yâ'agó me'ra niîrâ, yâ'ará tohása!. Koô me'ra ni'ká ipi tohára weesa!. ¹⁷Ni'kí Jesu Cristo marí wiôgi me'ra a'mé si'agi pe'e maa, naâ piarápita ni'ká ipi tohá, ni'káro noho wákusé kiasamá.

¹⁸Neê âpêrâre a'me tără baha ke'atisere wākū ma'atikā'ya. Apêye marí yâ'áro weesére marí ipí me'ra weetisa!. Marí a'me tără baha ke'atirā pe'e, marí ipí dohōrē'rā weé!. ¹⁹⁻²⁰Misâ masí weeti? Maríre Ô'âkî hi Espírito Santore o'ôo'ki niîwî. Mari yaá ipi Espírito Santo yaá wi'i niî'. Tohó weerá marí ipí me'ra no'ó iaró wee masí wee!. Jesu Cristo maríre ma'ígi, kîi yará niíato niîgi wērî wapa yeéki niîwî. Tohó weerá marí ipí me'ra Ô'âkî hi kîî iaró pe'e wee masí!. A'tîro weeká, âpêrâ kîîre âyuró wākûrasama.

Nimôtisekâhase niî'

7 Ni'károakâre misâ sêri yâ'a o'oka pûrîre yi'tigíti. Nimôtitikâ, marâpititikâ âyúkâ!, âyuró pe'e. ²Tohó niîmikâ, toopíre pâhará âpêrâ no'ó iaró a'me tără baha ke'atisama. Tohó weerá imiá naâ niki nimôtiro iá!. Numiâ kē'ra naâ niki marâpitiro iá!. ³Ímí kîî nimó me'ra âyuró niisétiato. Koô kē'ra kîî me'ra meharóta niisétiato. ⁴Marâpitigo a'tîro niitikâ'ato: "Yi'î iaró weegóti", niitikâ'ato. Koô marapí niî yuukâ, "Kîî iaró weegóti", niíato. Nimôtigi kē'ra "Yi'î iaró weegóti", niitikâ'ato. Kîî nimó niî yuukâ, "Koô iaró weegóti", niíato. ⁵Koô a'tîro weeáto. Koô marapí koô me'ra niî si'rikâ, yi'tiáto. Kîî kē'ra koôre yi'tiáto. Ô'âkî hire sêrirá tirá, tiikése nimiri "Marí wee wiáro noho weetíkâ'râ" niî apóka be'ro pûrikâ tohó weetíkâ'ato. Sêri tu'a ehaka be'ropi too dipóro niiséti'karo nohota marapí me'ra, nimó me'ra niíato taha. Tohó weetikâ, wākū tutuatikâ, wâtî misâre yâ'áro wee dutí boosami. Âpêrâ me'ra no'ó iaró a'me tără ma'akâ wee boosami.

⁶Yi'î misâre a'teré dutí butia'se weeró noho uúkūgi meheta weé!. Misâ tohó weé si'rikâ, âyurósa' niîgi, tohó niî!. ⁷Yi'î a'tîro wākū!. Yi'î misâ niî pe'tirâre yi'î weeró noho nimó marirá niikâ iamisa!. Ô'âkî hi pe'e masa nikíre naâ weé pō tēoátehere kûūki niîwî. Âpêrâre nimó mari dutígi ou marâpi mari dutígi kûūki niîwî. Âpêrâ pe'ere nimôti dutigi, marâpiti dutigi kûūki niîwî.

⁸Ni'károakâ misâ nimó marirâre, marâpi marirâre, wapê wi'ia numiare niîgiti. Misâ yi'î weeró noho nimôtitikâ, marâpititikâ, âyú niî!. ⁹Imiá numiâ me'ra niî si'rîrâ pō tēótirâ noho nimôtiato. Numiâ kē'ra meharóta marâpitiatio. Naâ nimôtikâ, marâpitikâ, nemoró âyú!. Naâ numiâ me'ra, imiá me'ra niî si'rîrâ, pi'etítikâ'ato.

¹⁰Yi'î marâpitirâre, nimôtirâre a'tîro dutí!. A'té marí wiôgi dutisé niî!. Yi'î teeré werê turia!. Numiô koô marapíre kô'âtikâ'ato. ¹¹Kô'âgo pûrikâ, âpi me'ra niórê'tikâ'ato. Marapí niîmi'ki me'ra apotígo, ni'kotá tohaáto. Ímí kē'ra meharóta kîî nimoré neê kô'âtikâ'ato. Kîî kē'ra kîî nimó niî'ko me'ra apotígi, meharóta tohaáto.

¹²Âpêrâ maa, yi'î Jesu Cristo bese kûú'ki niîgi, yi'î wākusére a'tîro niîgiti. Teé wākusé marí wiôgi yi'îre bu'ê'ke meheta niî!. A'tîro niîgiti. Ni'karérâ misâ Jesu Cristore êho peótigore nimôti boosa!. Koô mi'î me'ra niî nu'ku si'rikâ, kô'âtikâ'ya. ¹³Meharóta êho peótigire marâpitigo kē'ra mi'î me'ra kîî niî nu'ku si'rikâ, kô'âtikâ'ya. ¹⁴Naâ misâ me'ra niî yuukâ Ô'âkî hi naâre âyuró weesamí. Tohó weerá misâ pō'ra Jesu Cristore êho

peótirã pō'ra weeró noho niítisama. Ô'âkî hi misâ pō'rare âyuró weesamí. ¹⁵No'ó Jesu Cristore êho peótigi kîî nimoré kō'â sî'rigi noho pe'e kō'aáto. Jesu Cristore êho peótigo kē'ra koô marapíre kō'â sî'rigo noho kō'aáto. Ô'âkî hi marí âpêrã me'ra a'me kēése mariró niisétikã iamí. Naâ kō'â sî'rikã, âyurósa!. ¹⁶Kō'â no'ogo “Yi'î re kō'âtikã, yi'î marapíre Jesu Cristore êho peókã wee masí boopã”, niíta basió wee!. Kō'â no'ogi kē'ra “Yi'î re kō'âtikã, yi'î nimore Jesu Cristore êho peókã wee masí boopã”, niíta basió wee!.

¹⁷Tohó niímikã, a'teré yi'î niî pe'tirokãharã, Jesu Cristore êho peóri kurakãharãre dutí!. Misâ niki Ô'âkî hi misãre neê waró beserí kura niiséti'karo nohota a'tóka tero kē'rare niisétiro íá!. ¹⁸Ô'âkî hi ni'kiré ô'rekihí yapa kaseró yehê kō'a no'o'kire bese boósami. Kîî re besekã, meharóta yehê kō'a no'o'ki niíato. No'ó yehê kō'a no'oti'kire besekã kē'rare, meharóta yehê kō'a no'oti'ki niíato. ¹⁹Yehê kō'a no'o'ki, yehê kō'a no'oti'ki niisé wapa marí!. Ô'âkî hi dutisére weesé pe'e wapatí yi'ri ni'ka!. ²⁰Niî pe'tirã Ô'âkî hi besé ni'kaka tero ni'karo nohota niî nu'kukã'ro íá!. ²¹Ô'âkî hi da'rã ko'terãre bese boósami. Tohó besekã, misâ da'rã ko'tesere wãkû ke'titikã'ya. Apé tero misãre misã wiðrã wihãa dutirãsama. Áyú nií!. Naâ tohó niikã'ta, wihãa bakeo'ya. ²²Ô'âkî hi marí wiðgi Jesu Cristore êho peó dutigi misãre beséki niíwî. Misãre besé ni'kaka terore da'rã ko'terã ni'kãrã niíwî. Ni'kãroakã maa a'tíro nií!. Tohó da'rã ko'terã niímira, Jesu Cristo yarã nií tiharã, da'rã ko'tesere wihãa'kãrã weeró noho nií!. Kîi yeekãhasere da'rã!. Ápêrã kē'ra kîî besé ni'kari kurare da'rã ko'tetirã niikãrã niíwã. Ni'kãroakã maa Jesu Cristore da'rã ko'terã weeró noho niíma. ²³Ô'âkî hi misãre ma'ígi, kîi yarã niíato niígi Jesu Cristo wërisé me'ra wapa yeéki niíwî. Tohó weérã masaré da'rã ko'terã weeró noho niítikã'ya. ²⁴Ô'âkî hi neê waró besé ni'kaka tero misã niiséti'karo nohota niíya taha. Kîi yarã niíya.

²⁵Nimô marirá, marâpi marirá pe'e maa Jesu Cristo dutisé marí!. Tohó niímigi, no'ó yi'î basi wãkusé kã'ró misãre werêgiti. Misã yi'î re êho peó masí!. Marí wiðgi yi'î re pahã yã'a yuukã tohó wee masí!. ²⁶Yi'î a'tíro wãkû!. A'tóka tero pehé pi'etíse nií!. Tohó weérã nimô marirá ni'kãrã nimôtitikã'ya. ²⁷No'ó nimôtigipi ni'ki koðre kō'âtikã'ya. No'ó nimô marigí nimóti sî'rigi a'mátikã'ya. ²⁸Misã nimôtirã, Ô'âkî hire yi'ri ni'karã meheta weé!. No'ó nu'mió kē'ra marâpitigo Ô'âkî hire yi'ri ni'kago meheta weemó. Tohó niímiro, katirí imí kohore pehé pi'etíse nií!. Yi'î naâ tohó pi'etísere ia saátimisa!. Tohó weégi a'teré weré!.

²⁹Akawerérã, yi'î misãre a'tíro nií sî'risa!. A'tóka tero pehé pi'etíse nií!. Nemoró yã'ãro wa'aátoho kã'ró di'sá!. Ni'kakã me'ra nimôtirã, nimô marirá weeró noho ti'ó yã'aya. Misã nimosã numiare wãkû niriro noho o'ðrã, Ô'âkî hi pe'ere wãkû niri dutiro, tohó wa'ã!. ³⁰Dihãse wã'a utirí masa bihã weti dohatikã'ya. No'ó e'katirã noho e'katí dohatikã'ya. Misã apeká duusére misa yeé warore weeró noho ti'ó yã'atikã'ya. ³¹A'ti imí kohó pe'tí wã'karo weé!. Tohó weérã a'ti nukúkãkãhasere ipíti waró wãkútikã'ya.

³²Misãre wãkû ke'tiro mariró niikã íá!. Nimô marigí marí wiðgi yeekãhasere pũuro wãkû nirisami. Jesu Cristo iasére weé sî'risami. ³³Nimôtigi pe'e kîî nimó âyuró niikã íãgi, a'ti imí kohokãhasere wãkû nirisami. Kîî nimó e'katíká iasami. ³⁴Kîî marí wiðgi iasé kē'rare weé sî'risami. Tohó weégi kîî weé sî'rise piáro dika waá ni'kosami. Numiã kē'rare tohóta nií!. Marâpi marigó marí wiðgi yeekãhasere pũuro

wākû nirisamo. Ô'âkî hi iaró di'akî weé sî'risamo. Koô wākusépi kē'rare kîî iaró wākûsamo. Marâpîtigo pe'e koô marapí âyuró niiká iasamó. A'ti imí kohokâhasere pũturo wākû nirisamo. Koô marapí e'katíkâ weé sî'risamo.

³⁵Yi'î misâre âyuró wa'aáto niŋgi ohâ!. Âyuró niŋ dutigi, marí wiôgi iaró di'akî weé dutigi ohâ!. Misâre nimôtisere, marâpítisere ka'mú ta'agi meheta, tohó niŋ!.

³⁶Ni'kî kîî makó mu'yuká î'yâgi, a'tiro niŋ boosami: “Yi'î makore âyuró weetisa!. Koô marâpítikâ, âyu boósa!”, niŋ boosami. Tohó niigí noho numí sooato. Teé tohó weesé neé yâ'âro weesé níŋ wee!. ³⁷Ápí pe'e “Numí sooro iásato”, niŋti boosami. Kîî tohó weé sî'rise kîîre âyú niŋ boosa!. “Yi'î mako marâpítisome”, niŋ boosami. Kîî tohó niiká, koôre âyuró wa'ârosa!. ³⁸A'tiro niŋ!. Makoré marâpítí duti'ki âyuró weégi weesamí. Marâpítí dutitigi pe'e kē'ra tootá âyuró weé yi'ri ni'kasami. A'tiro niŋ!. A'tóka tero pi'etise pehé niŋ!. Tohó weéro marâpítitikâ, nemoró âyú niŋ!.

³⁹Maríre dutisé a'tiro niŋ!. Marâpítigo koô marapí katirí kura kîî me'ra niŋ nu'kukâ'ato. Kîî wērika be'ro koô no'ó ti'sagí noho me'ra marâpítiató, niŋ!. Koô marapí Jesu Cristore êho peógi niíato. ⁴⁰Yi'î pe'e a'tiro wākû!. Koô opâturi marâpítitigo, nemoró e'katí boosamo. Yi'î kē'ra âpêrà misâre bu'erá weeró noho Espírito Santore kió!. Tohó weégi tohó uúkû!.

Masá naâ yeê'kârare êho peórâ wa'íkî di'i o'ô'kekâhase niŋ'

8 Misâ sērî yâ'a'kere yi'tigíti. “Wa'íkî di'i masá naâ yeê'kârare êho peórâ o'ô'kere ba'aró iatí?” niisere yi'tigíti. Misâ “Naâ êho peóse yeê'kere wapa marí!, teeré masí toha!”, niísa!. Tohóta niŋ!, niŋro pe'ea!. Tohó niŋrâ, a'tiro niŋrâ weésa!: “Âpêrà yi'riôro masí yi'ri ni'ka!”, niŋrâ weésa!. Marí âpêrâre ma'írâ, naâre Ô'âkî hire nemoró êho peókâ weésa!. ²No'ó “Masí yi'riagi niŋ!” niigí noho neé kâ'ró masíti butia'kâ'sami. “A'tiro weé masiró iásato”, niŋtisami. ³Ô'âkî hi kîîre ma'igí pe'e maa a'tiro niŋsami: “Yagí niŋmi. Kîîre masí!”, niŋsami.

⁴Misâ wa'íkî di'i naâ yeê'kârare o'ô'ke pe'e a'tiro niŋ!. Misâ niŋro nohota naâ êho peóse yeê'ke wapa marí!. Âpêrà Ô'âkî hi weeró noho niirâ pia neé marimá. Kîî ni'kitá niŋmi. ⁵Âpêrà kîîre êho peótirâ pâhará âpêrà nohore êho peósama. I'miáropi niirâre, a'ti nukúkâpi niirâre êho peósama. Naâre marí Ô'âkî hire êho peóro weeró noho ti'ó yâ'asama. “Marí wiôrà niŋma”, niŋsama. ⁶Marí pe'e a'tiro masí!, Ô'âkî hi marí paki ni'kitá niŋmi. Kîî niŋ pe'tise a'ti nukúkâkâhasere bahúrē'ki niŋwî. Marí kîi yarâ kîî dutiró weehâh niŋ!. Tohó niiká Jesu Cristo kē'ra ni'kitá wiôgi niŋmi. Kîî me'ra niŋ pe'tise weé no'okaro niŋwî. Marí kē'rare kîi yarâ sâhaká weéki niŋwî. Tohó weerá marí kîî me'ra niŋ nu'kukâ'râsa!.

⁷Âpêrà Jesu Cristore êho peórâ, Ô'âkî hi ni'kitá niisere âyuró masí yi'ritisama. Naâ too dipóropi masá naâ yeê'kârare êho peó'ke bu'iri tohó niŋsama. Tohó weérâ ni'kâroakâre teé di'ire ba'ârâ, a'tiro niŋsama: “Teeré ba'ârâ, masá naâ yeê'kârare êho peórâ weé!”, niŋsama. Tohó weérâ êho peó tutuatirâ ba'ârâ, bu'iritirâ ti'ó yâ'asama. Tohó ti'ó yâ'amirâ, tohó ba'âkâ'sama. Teé me'ra naâ wākusere dohórē'sama. ⁸Marí ba'asé, marí ba'átise kē'ra maríre Ô'âkî hire nemoró êho peókâ weé wee!. Marí ba'ârâ, nemoró âyurá wa'âsome. Ba'âtirâ kē'ra, yâ'â butia'râ wa'âsome. ⁹Tohó niŋmikâ, âyuró weeyá misâ. Apé tero misâ no'ó iaró ba'â ma'arâ, âpi âyuró êho peó tutuatigire dohórē! boosa!. ¹⁰A'tiro niŋ!. Mi'î “Naâ êho

peóse yeê'ke wapa marí!" níi masímigi, naâ êho peó ba'â wiaropi ba'âgi wa'â boosa! Ápí êho peó tutuatigi pe'e mi'í tohó weesere í'yâ boosami. Mi'í ba'aká í'yâgi, "Masá naâ yeê'kârâre êho peógi weemí. Tohó weesé yâ'â níi", níi wákú boosami. Tohó wákúmigi, mi'í re í'yâ kúugi, kíí kē'ra ba'âkâ' boosami. Teeré ba'âgi, "Yâ'âro weégi weé", níi boosami. Kíí tohó wákusé bu'iri mi'í kíí re yâ'âro weégi weé! Tohó weérâ áyuró weeyá. ¹¹Mi'í masímigi ba'âgi, êho peó tutuatigi pe'ere dohórê'gi weé! Cristo kíí kē'rare wēri basaki níiwí. Mi'í ba'asé me'ra mi'í akawerégire dohórê'. ¹²Mi'í ba'âgi, Cristoreta yâ'âro weégi weé! ¹³Marí ba'asé me'ra marí akawerégi êho peó tutuatigire dohórê' boosa! Tohó weerí níirā, diakí híta ba'âti yí'riokā'ro íá!

Jesu Cristo yee kiti wererá re naâ bu'esé wapa wapa ta'a ba'â masisama niisé níi'

9 Yi'í Jesu Cristo bese kúú'ki níi'. Ápêrā kíí bese kúú'kārā weeró noho wee masí! Yi'í kē'ra marí wiógi Jesuré í'yáwi. Tohó níiká misâre marí wiógi kitire werêwi. Misâ teeré tí'ó êho peówi. Tohó weérâ yí'í Jesu Cristo bese kúú'ki niisére masí! ²Ápêrā yí'í re "Kíí Jesu Cristo bese kúú'ki meheta níimi", níirā níisama. Misâ pūriká tohó níitikā'ya. Yi'í misâre Jesu Cristore êho peókā weewí. Tohó níiká misâ kíí re êho peórâre ní'ká kurata neré ke'akā weewí. Tohó weesé me'ra misâ yí'í kíí bese kúú'ki niisére masí!

³Ápêrā yí'í re "Kíí Jesu Cristo bese kúú'ki meheta níimi" níiká, naâre a'tíro yí'tí nu'ku! ⁴Yi'í Jesu Cristo bese kúú'ki níi'. Tohó weégi yí'í bu'esé wapa naâ ba'asé ekaká, sí'risé tíaká, yê'ê masí! ⁵Apêye kē'rare yí'í ápêrā Jesu Cristo bese kúú'kārā, tohó níiká kíí akabihírā weeró noho wee masí! Tohó níiká Pedro weeró noho wee masí! Ní'kó numíó Jesu Cristore êho peógore níimóti, miáa masí! ⁶De'ró wákúti misa? Ápêrā Jesu Cristo bese kúú'kārā kíí yeé kitire wererá, da'ratíma. Ísâ di'akí Barnabé, yí'í, Jesu Cristo yee kitire wererá ba'â kati sí'rírā da'rá du'u masitisari? ⁷Surára kíí ba'asere kíí basi wapa yeétisami. Kíí wiórā kíí re ekasamá. Ísêre otegi tee dikare ba'ásami. Ovelha ko'tegí kē'ra ovelha ôpekó me'ra weé'kere ba'ásami. ⁸⁻⁹Yi'í re "Masá wákusé di'akí re weremí", níitikā'ya. Ô'ákí hi yee kiti ohâka pūripi Moisé Ô'ákí hi dutí'kere a'tíro níiki níiwí: "Wekí trígo áriági, tuu mahámi sítiasami. A'tíro weetíkā'ato. Trígore ba'ári níirā, isêropi tuu sáari be'tore tuu sáatikā'ya" kíí ba'â sí'rigi, ba'aáto, níiki níiwí. Ô'ákí hi teeré níigi, wekiá se'sarore wákúti níiwí. ¹⁰Kíí teeré níigi, ísâ kíí yeé kitire wererá re bu'ê sí'rigi tohó níiki níiwí. A'tíro níi! Di'târe se'e kúú mi'tagi, ápi trígore áriági naâ otê'ke dikare naâ piárā díka waátehere wákú yuurá, da'rasamá. ¹¹Ísâ misâre Jesu Cristo yee kiti wererá oterá weeró noho níiwí. Otegi teé otesé dikare míisami. Tohó weéro misâ ísâre apêye noho o'oká, áyú níi! ¹²Misâ ápêrā marikâre tohó o'ósa! Ísâ pūrikâre táhâsa!

"Ísâre o'ôya", níi masí! Tohó níimiká, "O'ôya", neê níi wee! Tohó níiro noho o'orā, su'ti nohó, ba'asé noho moórā, tohó tí'ó yâ'akā'wi. A'tíro wákúwi: "Marí sêriká pe'ere, Cristo yee kitire íati boosama", níi wákúwi. Tohó weérâ apêye noho mariká í'yârā, tohó tí'ó yâ'akā'wi. ¹³Misâ masí weeti? Ô'ákí hi wi'ipi da'rará masá Ô'ákí hire êho peórā ba'asé míiti kúú'kere ba'ásama. Naâ wa'íkí rāre wêhé í há moro peo wiaropi da'rará, teé dí're ba'ásama. ¹⁴A'té weeró noho Jesu Cristo yee kiti wererá kē'rare

“Naâ teé da'rasé me'ra wapá ta'a ba'aato”, níiki nífwī marí wiôgi. ¹⁵Tohō níimikā, yí'fí neê ní'kāti a'teré níitíkāti. Tohō níiká ní'kâroaká k'èrare misâre apêye noho o'ô dutigi meheta tohō ohâ'. Íhá boâ wêrimigi, misâre werê'ke wapa wapa seésome.

¹⁶Yí'fí Jesu Cristo yee kitire werêgi, teeré weresé bu'iri “Āpêrà yí'riôro āyú yí'ri ní'ka'”, níí wee'. Teé yí'fí da'rasé níí'. Yí'fí teeré werêtikā, yā'áro wa'â boosa'. ¹⁷Tohō weégi yí'fí iaró me'ra werêgi, wapá ta'a boopā. Yí'fí re weré dutisere weégi, Ô'âkī hi kûû'kere weégi weé'. Kīî yí'fí re wapa yeégisami. ¹⁸Yí'fí Jesu Cristo yee kitire werêgi, wapá ta'a ba'â masí'. Tohō weetá basiómikā, “Wapa yeéya”, níí wee'. Yí'fí wapá ta'ase a'tíro níí'. Jesu Cristo masaré yí'riómi níisê kitire werêgi, e'katí'. Teeré werêgi, wapa seé wee'. Teeréta yí'fí wapá ta'a'.

¹⁹Masaré yí'fí bu'esére tí'oáto níígi a'tíro weé'. Neê ní'kiré da'rá wā'ya ko'tegi níitimigi, níí pe'tirāre da'rá wā'ya ko'tegi weeró noho tí'ô yā'a'. Pāharā Cristo yarā sâhakā ia sâági, tohō weé'. ²⁰Judeu masa tíropi níígi, naâ Jesuré êho peókā ia sâági naâ weeró nohota níisêti'. A'tíro níí'. Judeu masa Moisé dutisé doka nííma. Ô'âkī hi yí'fí re teé dutisé doka níí dutitimi. Mehô naâ Jesu Cristore êho peókā ia sâági yí'fí k'èra naâ weeró noho Moisé dutisé doka weeró noho níí'. ²¹Judeu masa níitirā k'èrare Moisé dutisére masítirā, naâ Jesu Cristore êho peókā ia sâági naâ weeró noho níisêti'. Tohō níisêtimigi, “Ô'âkī hi dutisére weetígi níí'”, níí wee'. Cristore êho peó tíhagi, Ô'âkī hi dutiséreta weé'.

²²Yí'fí êho peó tutuatirā me'ra níígi, naâ Jesu Cristore êho peókā ia sâági naâ weeró nohota weé'. “Masí pe'okā'”, níí wee'. Tohō weégi níí pe'tirāre “Yí'fí de'ró weekā naâ yí'fí sí'rimiti naa?” níígi, naâ wee wíase nohoreta weesêti'. ²³Jesu Cristo yee kitire werêgi, naâ tí'oáto níígi tohō weé'. Kīî yéé kiti āyusé níí'. Yí'fí níí pe'tirā teeré masíkā íá'. Jesu Cristo naāre yí'rióse yí'fí wapá ta'ase níí'.

²⁴A'té me'ra misâre werê'. Omá wapá ta'arā níí pe'tirā omasamá. Níí pe'tirā omamírā, ní'kitá wapá ta'asami. Misâ teeré masí'. Misá k'èra níí pe'tirā wapá ta'a sí'rírā, wapá ta'agi weeró noho omayá. Misâre Ô'âkī hi o'oátehere wapá ta'a sí'rírā, kīî iaró weeyá. ²⁵Níí pe'tirā naâ omaátoho díporo āyuró omá bu'esama. Tohō weerā naâ keoró ba'ásama. Naâ ípiré dohoré'sere weetísama. Naâ pūrí me'ra weéka be'tore wapá ta'a sí'rírā, tohō wee yúúsama. Tíí be'to maatá boâ díha wa'ása'. Marí k'èra Ô'âkī hi íatísere, yā'asére du'úrā, Ô'âkī hi yeere weé'. Kīî o'oátehe wapá ta'a sí'rírā, tohō weé'. Kīî o'osé neê pe'tisomé. ²⁶Tohō weégi yí'fí omagí weeró noho keoró weé'. Wākútímigi, tohō weé ma'a wee'. Yí'fí weeátehere wākú yuu'. ²⁷Yí'fí iaró dí'akī weé wee'. Yā'áro íári pehasere weé wee'. Wākú tutua'. Tohō weetíkā maa, Jesu Cristo yee kitire apêrāre werekā, Ô'âkī hi yí'fí re “Āyuró weewí’”, nííti boosami. Ayusé yí'fí re o'ô boo'kere o'ôti boosami.

Diporókāharā weeró noho weetikā'ya níisê níí'

10 Jesu Cristore êho peórā, misâre a'teré misâ masíkā íása'. Ô'âkī hi ísâ Israel kurakāharā yêki simiá me'ra níiki nífwī. Kīî o'ôka kura o'me kurá me'ra naâ díporo í'mítā ki nífwī. Níí pe'tirā kīî re siru tuúrā, pahírí maa akó só'arí maa dekopi pē'âkārā nííwā. ²Naâ o'me kurāre siru tuú'kārā tíí maāre pē'â'kārā níí pe'tirā wamé yee no'o'kārā weeró noho tohákārā nííwā. Teé me'ra naâ Moisé yarā sâháakārā nííwā. ³Naâ níí pe'tirā Ô'âkī hi o'ô'ke í'mísekāhase maná wamêtisere ba'âkārā nííwā.

⁴Niŋ pe'tirā akó Ô'ākī hi o'ô'kere i'tâgapi niŋ'kere si'rîkārā niŋwā. Cristo i'tāga akó wihāakaga weeró noho niŋmi. Kīŋ naā niŋ pe'tirāre ko'têgi, niŋ pe'tirōpi ba'pāti wā'kaki niŋwī. ⁵Naāre tohō weemigi, Ô'ākī hi pāharāre ti'sâtiki niŋwī. Kīŋ re yi'rī ni'kakā i'yāgi, tohō weēki niŋwī. Teé bu'iri naā yukí marirōpi wa'ārā, pāharā boā baha ke'atikārā niŋwā.

⁶Naāre tohō wa'â'ke marīre bu'esé weeró noho niŋ'. Marīre naā yā'aro weé'karo weeró noho wee dutitiro tohō wa'ākaro niŋwī. ⁷Tohō weerā āpērā naā yeé'kere ēho peótikā'ya. Too dipórokāharā weeró noho weetíkā'ya. Ô'ākī hi yee kiti ohāka pūripi wekī ouro me'ra yeé'kire ēho peorā weé'kere a'tiro ohā no'okaro niŋwi: “Masá ba'á, si'rîkārā niŋwā. Tu'ā eha ni'ko, naā no'ó iaró bosē nimi ni'kākārā niŋwā.” ⁸Marī naā weeró noho no'ó iaró a'me tārā baha ke'atitikārā. Naā marikā tohō weé'ke wapa ni'ká nimi vinte e três mil wērîkārā niŋwā. ⁹Naā marī wiōgi Ô'ākī hire yā'aro uúkükārā niŋwā. Ô'ākī hi marīre ko'tētimi niŋrā, kīŋ re uakā weekārā niŋwā. Marī naā weé'karo noho weetíkārā maha. Naā marikā teeré weerā, pāharā āyā kūrī wēhe no'okārā niŋwā. ¹⁰Tohō niiká misā Ô'ākī hi me'ra naā weé'karo noho ti'sâtirā, niŋtikā'ya. Naā tohō weeká i'yāgi, Ô'ākī hire werē ko'tegi i'mfsekī hi naāre wēhé kō'aki niŋwī.

¹¹Ô'ākī hi marīre masī dutigi naāre tohō weēki niŋwī. Marī a'tóka terokāharāre a'ti imí koho dihā wā'karo weé'. Ô'ākī hi diporókāharāre bu'iri da'rēki niŋwī. Teé bu'iri da'rē'kere kī yee kiti ohāka pūripi ohā dutiki niŋwī. Marīre naā weeró noho yā'aro wee dutitigi tohō weēki niŋwī. ¹²No'ó “Yi'ŋ pūrikā āyuró ēho peó', yā'aro weesomé” niigi noho ti'o masíya. Apé tero weégi mi'ŋ yā'aro wee boósa!. ¹³Apé tero marī basi yā'aro weé si'rîsa!. Ou apé tero wātī marīre yā'aro wee dutisami. Marī di'akī mehereta tohō wa'â!. Niŋ pe'tirāre tohō wa'ása!. Ô'ākī hi pe'e kīŋ “Weegiti” niŋ'kere weetíkā weetísami. Kīŋ marī yā'aro weé si'rîkā, ni'kaato niigi marīre wee tamúsami. Tohō weerā marī yā'aro wee boó'kere weé wee'.

¹⁴Tohō weerā Jesu Cristore ēho peorā yi'ŋ ma'irā, misā naā yeé'kārāre ēho peoropi neé wa'âtikā'ya. Teeré neé kāró ēho peótikā'ya. ¹⁵Misāre masaré weeró noho uúkū!. Misā basi yi'ŋ uúküsere ti'ó yā'aya. ¹⁶Marī pōo tērīrā, si'rīrī paa si'rīatoho diporo Ô'ākī hire “Āyú!” niŋ'. Tii paāre si'rīrā, Jesu Cristore bu'ŋ peha tamu!. Kīŋ marīre wērī basagi, kīŋ di' a'mā biroki niŋwī. Tohō niiká pāugāre dika waā ba'ārā, ni'ká kura, ni'ká ipi wa'â!. Teeré ba'ārā, Cristo kurúsapi wērī'kere bu'ŋ peha tamu!. ¹⁷Marī pāharā niŋmirā, ni'kágakāhase pāurē ba'â!. Tohō weerā marī ni'ká kura, ni'ká ipi weeró noho niŋ'.

¹⁸Israel kurakāharāre wākūya. Naā Ô'ākī hire ēho peorā, wa'ŋkī rāre i hā moro peosama. Teé di'ire ba'ásama. Teeré ba'ārā, naā Ô'ākī hire bu'ŋ peha tamusama. ¹⁹Misāre a'tiro niigiti. Yi'ŋ masā naā yeé'ke pe'e maa “Wapatī!”, niigi meheta weé!. Wa'ŋki di'ŋ naā yeé'kārāre wēhé i hā moro peo'ke kē'rare a'tiro niigiti: “Apēye di'ŋ weeró noho niŋ!”, niigi meheta weé'.

²⁰Tohō niŋtimigi, a'tiro niŋ!. Ô'ākī hire ēho peótirā naā yeé'kārāre wa'ŋkīrā wēhé i hā moro peorā, wātiāre ēho peorā weemá. Ô'ākī hi mehereta ēho peóma. Naā tohō weeká, misā naā me'ra nerē ba'ārā, wātiā me'ra bu'ŋ peha tamurā weé!. Misā tohō weeká iá wee!. ²¹Marī pōo tērīrā, marī wiōgi yaa paare si'rī!. Kīŋ re bu'ŋ peha tamurā, kī i yeére ba'â!. Naā yeé'kere ēho peó wiaropikāhase pe'e naā o'osé teé si'rîsé, teé ba'asé wātia yeé niŋ!. Tohō weerā misā marī wiōgire bu'ŋ peha tamurā, kī i yeére ba'ārā, wātia yeé pe'ere ba'āta basió wee!. Wātia yeére ba'ārā, naāre bu'ŋ peha tamu boosa!.

²² Marí, wātiāre bu'í peha tamurā, marí wiōgi Ô'ākī hire doékā wee boósa'. Kīî marí me'ra uaká, marí pōo teótisa'. Kīî tutuagí niîmi.

Marí iaró di'akí weérā, āpêrāre ma'ití boosa' niisé niî'

²³ Masá a'tíro uúkū wiasama: “Marí weé s'i'risere no'ó iaró wee masí'.” Tohōta niî', niîro pe'ea'. Apêye marí weé s'i'rise maríre wee tamútisa'. Marí iaró weérā, āpêrāre Ô'ākī hire nemoró êho peókā weetí boosa'. ²⁴ Āpêrāre āyuró wa'aká ia sáaro íá'. Mari yeé di'akíre wākū niritikā'ro íá'.

²⁵⁻²⁶ Ô'ākī hi yee kiti ohāka pūripi a'tíro ohā no'okaro niîwi: “Niî pe'tise a'ti nukúkāpi niisé marí wiōgi yee niî'”, niî ohā no'okaro niîwi. Niî pe'tise ba'asé Ô'ākī hi weé'ke niî'. Tohō niî yuukā, niî pe'tisere ba'ā masí'. Tohō weérā ba'asé duā wiaropi duasére no'ó iaró duú ba'aya. Misā bu'iritirā ti'ó yā'ari niîrā, “Naā yeé'kārāre o'ô'ke di'i niîti?” niî sērī yā'atikā'ya.

²⁷ Apé tero weégi ni'kí Jesu Cristore êho peótigi misāre kīî tiropi ba'á duti boosami. Misā kīî tiropi wa'ā s'i'rirā, niî pe'tise kīî ekasére ba'āya. Misā bu'iritirā ti'ó yā'ari niîrā, “A'té naā yeé'kārāre o'ô'ke di'i niîti?” niî sērī yā'atikā'ya. ²⁸ Toopí niirí kura ni'kí Jesu Cristore êho peógi misāre a'tíro niî boosami: “A'té naā yeé'kārāre o'ô'ke di'i niî'”, niî boosami. Kīî tohō niiká, teé di'ire ba'atikā'ya. Kīî misā ba'aká maa, mehékā wākū boosami. Tohō wākūtikā'ato niîrā tohō weeyá. ²⁹ Tohō niîgi, kīî wākusére uúkūgi weé'. Misā wākusé mehereta uúkū'. Marí a'tíro niî boosa': “Āpí yā'āro ti'ó yā'ase bu'iri de'ró weeákíhi yi'í weé s'i'risere dika yuú boosari? ³⁰ Yi'í ba'asére Ô'ākī hire “Āyú'” niiká, āpêrā yi'í ba'asére mehékā niî masitisama”, niî boosa'. ³¹ A'tíro niî'. Marí ba'asé, s'i'risé me'ra āyuró weeká maa, āyú niî'. Niî pe'tise marí āpêrāre êho peókā weeká, āyú nísa'. Tohō weeká, niî pe'tirā Ô'ākī hire e'katí peorāsama. ³² Misā weesé me'ra niî pe'tirā Ô'ākī hi yarāre, Judeu masare, Judeu masa niîtirāre yā'āro weeká weetíkā'ya. ³³ Yi'í weeró noho weeyá. Niî pe'tise yi'í weesé me'ra Ô'ākī hi yarāre āyuró weé s'i'ri'. Niî pe'tirā Jesu Cristore êho peókā ia sāági naā ti'sasére weé nu'ku s'i'ri'. Yeé pe'ere āyuró weé s'i'ri' wee'. Āpêrā yee pe'ere naā yi'riká ia sāági wākū niri'.

11 Misā kē'ra yi'í weeró noho weeyá. Cristore yi'í siru tuúro nohota yi'íre siru tuúya.

Numiā naā êho peó wiaropi wee wiāse niî'

² Yi'íre misā wākuká, yi'í bu'ê'kere keoró weeká ti'ógi, e'katí'. ³ Apêye noho misāre masiká íá'. Cristo imia níkiré naā dípoá niîmi. Ímí pe'e numiô dípoá niîmi. Ô'ākī hi kē'ra Cristo dípoá niîmi. ⁴ Ímí Ô'ākī hi wi'ipi kīîre sērīgi, kīî dípōapi su'ti kaséroré pesátisami. Tohō niiká Ô'ākī hi weré duti'kere weré turiagi, pesátisami. Pesági pūrikā, bopōyaro weégi wee boosami. Kīî tohō weégi, marí wiōgi Jesu Cristore wio pesásé me'ra êho peóti boosami. ⁵ Numiô pūrikā Ô'ākī hire sērigo, dípōapi su'ti kaséroré pesásamo. Tohō niiká Ô'ākī hi weré duti'kere weré turiago, meharóta weesamó. Koô pesátigo, bopōyaro weégo wee boosamo. Ímí weeró noho wee boosamo. Koô marapíre, koô wiōgire yi'í ni'kago wee boosamo. Poárire seé kō'a wiha weé no'oko weeró noho niî boosamo. ⁶ Koô pesátikā, diakí híta koô poárire seé kō'a wiha weé pe'okā'ro íá'. Tohō weé s'i'ritigo, bopōya niî' nígo, pesaáto. ⁷ Ímí pe'e pesátikā'ro íá'. Kīî Ô'ākī hi weeró noho wiōgi niîmi. Ímí Ô'ākī hi wiōgi niîmi niisére i'yomí. Numiô pe'e ímí wiōgi niîmi niisére i'yomó. Tohō weégo koô su'ti kaséroré pesaró íá'.

⁸Neê waropi Ô'âkî hi imiré weégi, numio yaá ô'a me'ra weetîki niîwî. Numiô pe'ere imi yaá ô'a me'ra weêki niîwî. ⁹Ô'âkî hi numiôre wee tamuákihi imirêta weêki niîwî. ¹⁰Tohô weerã numiâ misâ nerê wiaropire niîrã, su'ti kasérove pesaró iá!. Tohô weégo koô imiá dutisé doka niisére i'lyosamó. Apêye kê'rare Ô'âkî hire werê ko'terã i'mîsepi niîrã koô tohô weesére i'lyásama. ¹¹Tohô niîmikã, marî Jesu Cristore êho peorã a'mêri wee tamú!. Imiâ numiâ wee tamúse me'ra niî masísama. ¹²Diakî híta niî!. Ô'âkî hi numiôre imi yaá ô'a me'ra weêki niîwî. A'té kê'ra diakî hí niî!. Imiâ numiâpire bahuásama. Niî pe'tirã Ô'âkî hi weé no'o'kãrã di'akî niîma.

¹³Misâ de'ró wãkûti? Numiâ naã Ô'âkî hi wi'ipi Ô'âkî hire sérirã, dipôapi su'ti kaséro pesâtikã äyuti? Äyú wee!. ¹⁴Niî pe'tirã masi no'o!. Imi poã ni'mo yoarí ni'mo kiokã, bopôya niî!. ¹⁵Numiâ pe'e koô poã ni'mo yoarí ni'mo kiokã, äyú yi'ria!. Koô dipôare ma'mã su'ago poã ni'more o'másamo. Su'ti kaséro pesãgo weeró noho weesamó. ¹⁶Yi'î uúküsere “Tohô niî wee!” niigi nohere a'tîro niîgiti. “Ïsã, tohô niikã äpêrã Jesu Cristore êho peorã apêye weesétise nohopi maa marî!”, niîgiti.

Mii neé ba'ãrã keoró weeti'ke niî'

¹⁷Ni'kãroakã misãre apêye ohã!. Teeré ohãgi, “Äyuró weerã weé!”, niigi meheta weé!. Misã nerêrã, äyuró wee boóro noho o'ôrã, mehó pe'e dohorê'apa'ro. ¹⁸Misãre a'tîro niî mi'tagiti. Misã nerê wiarã, dika watísa!. Misã tohô weesé kitire ti'owí. Yi'î ti'ó yã'akã, a'te kití diakî híta niísa!. ¹⁹Misã a'tîro niî wãkúsa!: “Marí dika watí wiharó iá!. Teé me'ra noã pe'e Jesu Cristo yarã waro niítito? niisére i'yorása!”, niísa!.

²⁰Misã dika watíse bu'iri mii neé ba'ãrã, marí wiôgi kîî bu'erã me'ra ba'ã tio'karo weeró noho keoró etí ba'atísa!. ²¹Misã ba'asé miásasere no'ó iaró ba'ã ni'kasa!. Pahiró ba'ã, si'rí, ke'ása!. Äpêrã pe'e ba'ãtirã ihã boásama. ²²Misã wi'seri mootí? Misa yeé wi'seripi ba'ã, si'ri boósa!. No'ó iaró weerã, misã nerê wiasere wapa marí!, niîrã weé!. Ba'asé moorãre bopôyaro yi'rikã weerã weé!. De'ró niî boosari misãre? A'teré misãre “Äyuró weerã weé!”, niî wee!.

Jesu Cristo kîî bu'erãre si'orí ba'ã tio'ke niî'

(Mt 26.26-29; Mc 14.22-25; Lc 22.14-20)

²³Yi'î misãre bu'ê'kere marí wiôgi yi'îre bu'êwî. A'tîro niî!. Jesu kîîre i'lyã tu'tirãpire o'oátihi yamita Jesu pãuré miî, ²⁴Ô'âkî hire “Äyú!” niiki niîwî. Tu'ã eha ni'ko, tigaré kîî bu'erãre dika waákí niîwî. Be'ró naãre niiki niîwî: “A'té yi'î ipí niî!. Yi'î misa yeé niíátehere wêri basagiti. A'tîro yi'î ni'kãroakã weé'karo noho weé nu'kukã'ya. Teeré weerã, yi'î misãre wêri basasere wãkúya”, niiki niîwî. ²⁵Naã ba'ãka be'ro si'rírí paare miî, naãre niiki niîwî: “Misa yeé niíátehere yi'î wêri'giti. Yi'î wêrikã, yeé dií a'mã birorosa!. Ô'âkî hi diporópi misã me'ra 'A'tîro apogíti, niiki niîwî. Kîî ni'karo nohota yeé dií me'ra misã me'ra apogísami. Misã niî pe'tisetiri tii paãre si'risétiri niki yi'îre wãkúya”, niiki niîwî. ²⁶A'tîro niî!. Misã pãuré ba'ãrã, tii paãre si'rírã, marí wiôgi kîî maríre wêri basãkere i'yó nu'kurã weé!. Misã teê kîî opãturi a'tikãpi teeré tohô weé nu'kukã'rãsa!.

**Põo tēriátoho diporo marí weesétisere
wākū mī'ta dutise nií'**

²⁷No'ó wio pesáro mariró teé pāuré ba'á ma'agi noho, tii paáre sī'rí ma'agi noho bu'fri kiomí. Marí Wiógi Jesu Cristo kīî wērisére, kīî yee dífre mehō niisé weeró noho ti'ó yá'asami. ²⁸⁻²⁹A'tíro nií'. Marí Jesu Cristore ēho peorā nerē wiarā, ni'ká kura, ni'ká ipi nií'. Marí wiógi yaa ipi nií'. Marí teeré keoró wākūtimirā, pāuré ba'á, tii paáre sī'riká, Ô'ákī hi bu'fri da'rēsami. Tohō weerā nií pe'tirā marí pōo tēriátoho diporo marí weesére yā'áro weeká ti? niírá, wākū mī'taro íá'. Tohō weéka be'ropi pāuré ba'á, tii paáre sī'ri masí'. ³⁰Misā tohō weetise bu'fri pāhará do'áti, tutuátima. Ni'karérā wēria tohama. ³¹Marí pōo tēriátoho diporo wākū mī'takā maa, Ô'ákī hi tohō bu'fri da'rēti boosami. ³²Marí wiógi āyuró weeáto niígi maríre bu'fri da'rē we'osami. Kīî maríre, āpērā kīî re ēho peotírā me'ra pekā me'epi wa'aká íatími. Tohō weégi yā'áro weesére du'tutígi maríre bu'fri da'rē we'omi.

³³Tohō weerā, akawerérā, mii neé ba'árā, a'tíro weeyá. Ni'káro me'ra ba'árātírā, yuú kueya. ³⁴No'ó ihá boági noho kīî yáa wí'ipi ba'aáto. Tohō weeká, Ô'ákī hi misā āyuró nereká í'yági, bu'fri da'résome. Apēye maa misā tiropi wa'ági, apogíti.

Masa níki wee masísere Espírito Santo o'osé nií'

12 Akawerérā, Espírito Santo misāre Ô'ákī hi yeere wee masiátehere o'ómi. Misāre teeré keoró masaká íá'.

²Misā masí', Jesu Cristore ēho peoátoho diporo masá yeê'kere no'ó iaró ēho peó siru tuukārā niíwi. Naá yeê'ke katisé meheta niíkaró niíwi. Uúkütikaro niíwi. ³Misā masítikārā niíwi. Teé bu'fri a'tíro masaká íá'. Neé ni'kí Espírito Santore kiogí Jesuré a'tíro nií masitísami: “Pekā me'epi wa'aáto”, nií masitísami. Tohō uúkūgi pūrikā Espírito Santo o'osé me'ra meheta uúkūsami. Apí “Jesu marí wiógi niími” niigí pūrikā Espírito Santore kiomí. Espírito Santo moogí tohō nií masiti boosami.

⁴Maríre Espírito Santo kīî wee masise o'osére mehékā di'akí dika waásami. Teeré Espírito Santo ni'kitá o'ómi. ⁵Kīî o'osé me'ra marí wiógi Jesu Cristo maríre mehékā di'akí da'ra dutísami. Tohō da'ra dutímigi, Jesu Cristo ni'kitá niími. ⁶Kīî dutisére weerā, mehékāri di'akí weesa'. Ô'ákī hi ni'kitá nií pe'tirā marí weesére āyuró wa'aká weesamí. ⁷Espírito Santo kīî o'osé me'ra marí níki kīî marí me'ra niisére í'yosamí. Kīî o'osé me'ra marí nií pe'tirā Jesu Cristore ēho peóri kurakāharare a'mēri āyuró wee masí'. ⁸A'tíro nií'. Āpērāre kīî masise o'osé me'ra uúkū me'rikā weesamí. Āpērāre meharóta kīî me'ra Ô'ákī hi yee kiti ohāka pūripi ohā'kere ti'o masí, weré me'rikā weesamí. ⁹Āpērāre kííta taha ēho peó yí'ri ní'kasere o'ósami. Tohō niiká āpērāre do'átirāre yí'rió masisere o'ósami. ¹⁰Āpērā kīî tutuaró me'ra āyusé weé í'yo masisama. Āpērāre Ô'ákī hi weré'kere weré turia masisere o'ósami. Āpērāre “Noá wātí me'ra nií soo uúkūti? Noá Espírito Santo me'ra diakí hí uúkūti?” nií bese masísere o'ósami. Espírito Santo āpērāre apēye naá uúkū masitimi'kere uúkūkā weesamí. Āpērāre Espírito Santo naá uúkūseré masítimirā, ti'o masí weré turiakā weesamí. ¹¹Espírito Santo kīî iaró kīî o'ó sī'risere marí níki dika waásami. Maríre mehékāri di'akí weeséiatehere dika waásami. Kīî ni'kí niímigi, tohō weesamí.

Marî pâhará niîmirá, ni'ká kura, ni'ká ipita niî' niisé niî'

¹²Marî ipí ni'ká ipi niîmiro, pehé dika watí'. Tohô dika watímiro, ni'ká ipita niî'. Cristo kê'ra tohôta niîmi. Pâhará kîîre êho peóma. Naâ pâhará niîmiká, kîî ipí weeró noho ni'ká kura kîî me'ra niîma. ¹³A'tîro niî'. Marî kîîre êho peórâ niî pe'tirâ Judeu masa, Judeu masa niîtirâ, âpêrâre da'rá wā'ya ko'terâ, da'rá wā'ya ko'tetirâ Espírito Santo ni'kí me'rata wamê yee no'owi. Tohô weérâ ni'ká ipi niî'. Marî niî pe'tirâpita Espírito Santoreta kió'.

¹⁴Ni'ká ipi pehé dika watíse kióká'. ¹⁵Marî di'pôkâ uúkuri di'pôkâ niîro, a'tîro niî boosa: "Amûkâ meheta niî'. Tohô weégi marî ipikâháse meheta niî'." Tohô niîmiro, tii ipípita niî'. Toopíta wā'yá'. ¹⁶Marî o'mê peero a'tîro uúkú boosa: "Kapêa meheta niî'. Tohô weégi marî ipikâháse meheta niî'." Tohô niîmiro tii ipípita niî'. Toopíta wā'yá'. ¹⁷Marî ipí kapêaho di'akî niiká, de'ró weé marî wîhî yā'a boosari? Marî ipí o'mê peeroho di'akî niiká, de'ró weé marî wîhî yā'a boosari? ¹⁸Ô'âkî hi marî ipiré weé'ki pe'e kîî iaró noho niî pe'tisere keoró kûúki niîwî. ¹⁹⁻²⁰Ni'ká ipi pehé dika watíse kió'. Tohô niîmiro, ni'ká ipita niî'. Pehé dika watíse moóro, ni'ká ipi meheta niî'. Marî Jesu Cristore êho peórâ ni'ká ipita niî'.

²¹Kapêa amûkâre "Mi'îre iatísa'", niî masitisa'. Di'pôa kê'ra di'pôkârire "Íatísa'", niî masitisa'. ²²A'tîro pe'e niî'. Marî ipikâháse niî pe'tisere iá'. Marî ipipíre apêye mehó niisé niî'. Tohô niîmiká, teé mariká, katí masitisa'. ²³Marî apêye ipikâháserere mehó niisé ti'ó yā'a'. Tohô weérâ teeré âyuró bahuaáto niîrâ âyuró apó'. Apêye kê'rare masá i'yatiká'ato niî, bopôya sâarâ, su'tí sâyâ ka'mú ta'a'. ²⁴Apêye nemoró âyuró bahusé me'ra pe'e maa tohô weé wee'. Ô'âkî hi marî ipikâháserere âyuró apóki niîwî. Ni'ká ipita âyurí ipi niíato niîgi tohô weéki niîwî. Marî mehó niisé ti'ó yā'ase nohere âyuró wâkuká weéki niîwî. Teé weeró noho marî mehó niigí ti'ó yā'agire maríre âyuró wâkuká weemí. ²⁵Kîî tohô weégi, niî pe'tise marî ipikâháserere ni'kâro noho a'mêri wee tamú dutigi tohô kûúki niîwî. ²⁶Marî ipipíre ni'kâro pûriká, niî pe'tiropi se'sâa wa'â'. No'ó ni'kâro âyuró wa'aká, niî pe'tiropi âyuró ti'ó yā'a'.

²⁷Tohô niîgi, a'tîro niîgi weé'. Marî Cristore êho peórâ kîi yáa ipi weeró noho niî'. Marî níki kîi yáa ipikâharâ niî'. ²⁸Ô'âkî hi marî ipikâháserere dika waáki niîwî. Kîî tohô weé'karo noho Jesu Cristore êho peóri kurakâharâre a'mêri wee tamuátehere kûúki niîwî. Neé waro Jesu Cristo bese kûú'kâre niî pe'tirâ bu'ipi bese kûúki niîwî. Naâ be'rokâharâ Ô'âkî hi weré duti'kere weré turíarâre kûúki niîwî. Naâ be'rore Ô'âkî hi yee kitire bu'eráre kûúki niîwî. Be'ró âyusé, mehêkâ bahusére weé i'yorâre kûúki niîwî. Naâ be'rore do'âtirâre yi'riórâre, wee tamúrâre, tohô niiká dutirâre kûúki niîwî. Niî pe'tirâ be'ro apêye naâ uúkú masitimi'kere uúkûrâre kûúki niîwî. ²⁹Marî niî pe'tirâre meharóta wee dutígi kûútki niîwî. Marî niî pe'tirâ Jesu Cristo bese kûú'kârâ níí wee'. Niî pe'tirâ Ô'âkî hi yeere weré turíarâ níí wee'. Niî pe'tirâ Ô'âkî hi yee kitire bu'erá níí wee'. Niî pe'tirâ âyusé mehêkâ bahusére weé i'yo masi wee'. ³⁰Niî pe'tirâ do'âtirâre yi'rió masi wee'. Niî pe'tirâ apêye uúkûsere uúkú wee'. Niî pe'tirâ naâ tohô uúkúkâ ti'ó masitimirâ, weré turia masi wee'. ³¹Misâre Espírito Santo kîî wee masísere o'oká maa, âyú yi'riasere besé yi'ri ni'kaya. Yi'î misâre até niî pe'tise nemoró âyú yi'ri ni'kasere werégití.

Ma'isé apêye noho yi'rióro äyú yi'ri ni'ka' niisé nií'

13 Marí ape masá yee uúküsere masítimirá, uúkú masi boosa'. Tohó wee masímirá âpêräre ma'itírá, to'âti ou kome pîhíre no'ó iaró paâ ma'arâ weeró noho nií boosa'. ²Apêyere Ô'âkí hi maríre werê'kere äyuró werê turia masi boosa'. Tohó weemírá âpêräre ma'itírá, ti'o masítirá weeró noho nií boosa'. Tohó niiká nií pe'tise masá masíya marí'kere masí boosa'. No'ó nií pe'tisere masí pe'oká' boosa'. Tohó masímírá âpêräre ma'itírá, ti'o masítirá weeró noho nií boosa'. Marí êho peó yi'ri ni'karâ pûrikâ, irígíre apêropi wa'â duti masi boosa'. Tohó weeté basiómikâ a'mêri ma'isé moórâ, mehó waro uúkú ma'akâ' boosa'. ³Marí kiosé nií pe'tisere pahasé kioräre o'ó boosa'. Marí naäre ma'itímírá o'órâ, tohó o'ó ma'akârâ weesa'. Marí Ô'âkí hi yeere weeká, kíî re êho peótírá maríre í hâ duti boosama. Kíi yeere weemírá âpêräre ma'itírá, Ô'âkí hi maríre "Äyuró weewí", niítisami.

⁴Marí âpêräre ma'írá, a'tíro weé'. Äpêrá maríre mehêká weeká, naâ weesére ni'ká'. Nií pe'tiräre äyuró weé'. Äpêräre ió wee'. Misâ âpêräre ma'írá, a'tíro nií wee': "Misâ nemoró äyú yi'ri ni'karâ nií'", nií wee'. "Äpêrá yi'rióro äyuró weé yi'ri ni'karâ nií'", nií wee'. ⁵Äpêräre êho peóse me'ra uúkú!. Mari yeé se'sarore wákú wee'. Uâ miya wee'. Äpêrá maríre mehêká weeká, yoaká uâ nu'ku wee'. ⁶Äpêrá yä'áro weeká í'yârâ, e'katí wee'. Naâ äyuró weeká pe'e, e'katí tamu!. ⁷Äpêrá naâ yä'áro weesére neê käló werê turia wee'. Naâ yä'áro weemíkâ naäre äyuró wákú!. "Be'ropí äyuró weerásama", nií wákú!. Nií pe'tise âpêrá maríre yä'áro weeká, wákú tutua!.

⁸Ma'isé pe'tisomé. Nií nu'kukâ'rosa'. Apêye Ô'âkí hi maríre wee masise o'osé pûrikâ pe'ti dihárosa'. Be'ropí Ô'âkí hi kíi yeere werê turia masise o'osé kê'ra pe'ti dihárosa'. Nií pe'tise kíi yeere masí pe'okâ'rása'. Apêye uúkú masitimi'kere Ô'âkí hi uúkú masise o'osé kê'ra pe'tirósa'. Äpêrá yi'rióro masisé o'ô'ke kê'ra pe'tirósa'. Nií pe'tisere masírasa!. ⁹A'tíro nií!. Marí nií pe'tisere masí pe'o wee'. Ô'âkí hi yee kê'rare ni'karéta werê masí!. ¹⁰Be'ropí Jesu Cristo opâturi a'tiká, masí pe'okâ'rása'. Marí masí pe'okâ maa, marí masími'ke mehó niisé toharósa'.

¹¹Marí wi'mará niírá, naâ wee wiáro noho weewí. Bikirá wa'árâ, wi'mará weesére du'úkâ'wi. ¹²Tohó weeró noho a'tóka tero marí äyuró masí wee!. Êoro meharópi marí í'yáro weeró noho nií!. Keoró bahú wee!. Be'ró bahú yoropi Ô'âkí hire í'yârása'. Ni'kâroakäre marí kâ'roákâ masí!. Be'ró kíi maríre masíro nohota masí pe'okâ'rása'. ¹³A'tóka terore êho peóse, e'katí yuuse, ma'isé nií!. A'té i'tiáro pe'tisomé. Ma'isé pe'e apêye nemoró äyú yi'ri ni'ka'.

Apêye uúküsere ti'otímírá uúkürâ, a'tíro weeró íá' niisé nií'

14 Äpêräre ma'isére wákú yi'ri ni'kaya. Tohó niiká Ô'âkí hi Espírito Santo me'ra o'osére iayá. Apêyere masítimírá uúkú masise Espírito Santo o'osé nií!. Ô'âkí hi yeere werê turia masise kê'ra kíi o'oséta nií!. Kíi o'osére werê turia masisere iâri peha yi'ri ni'kaya. ²No'ó apêye uúküsere masítimigi uúkúgi noho Ô'âkí hi di'akí re uúküsami. Masaré uúkütisami. Kíi uúküsere ti'otísama. Espírito Santo tutuaró me'ra masí no'oya marisére uúküsami. ³Ô'âkí hi yeere werê turiase pe'e masaré uúküse nií!. Teeré werêrá, marí âpêräre Ô'âkí hire nemoró êho peókâ weé!. Naâ e'katíká, wákú tutuakâ weé!. ⁴No'ó apêyere masítimigi uúkúgi noho kíi

se'saro Ô'âkî hire nemoró êho peó wâ'kagi weesamí. Ô'âkî hi yee kitire werê turiagi pe'e âpêrâ Jesu Cristore êho peorã nerê wiari kurakâharãre nemoró êho peókã wee nemósami. ⁵ Misã niî pe'tirãre apêye uúküsere masítimirá, niî pe'tirã uúkû masakã iamí! Teé yî'rióro Ô'âkî hi yeere werê turia masise pe'ere ia sãã yî'ri ni'kami! Werê turia masigi pe'e âpi âpêrã yeere masítimigi uúkûgi nemoró wapatími. Ni'kí apêyere masítimigi, uúküsami. Be'ró kîí uúkû'kere "A'tíro niî sî'ríro weeápi", niî werê turiakã, âyú niísa! Tohó werêgi, niî pe'tirã Jesu Cristore êho peóri kurakâharãre nemoró êho peókã weesamí. ⁶ A'tíro nií! Yî'í misã tîropi wa'âgi, apêye uúküsere uúkûgi, wee tamúti boosa! Ô'âkî hi yî'í re masisé o'osére bu'êgi pûrikã, wee tamú boosa! Misãre Ô'âkî hi werê duti'kere werê turiagi kê'ra, wee tamú boosa! Tohó niikã misãre apêyere bu'ê nemogi, wee tamú boosa!

⁷ Bisisé katisé moosékãhasere werêgiti. Wêôwi no'ó iaró putí ma'akã, yê'e nohó basasé niísari, niíta basió wee! Biã pítero no'ó iaró biã pítekã, yê'e nohó basasé niísari, niíta basió wee! ⁸ Surãra a'mê wêherã wa'ãra, naã putipihíre keoró putitíkã, naa yeére apo yuútisama. ⁹ Marí kê'ra tohóta niísa! Marí keoró uúkütikã, de'ró niíro weesarí, niíta basió wee! Mehó waro uúkû ma'akã' boosa! ¹⁰ "A'ti nukúkãpire pehêteakã uúküse nií", niíta basió wee! Nií pe'tise teé uúküse niki ti'otã basió! ¹¹ Yî'í âpêrã uúküsere ti'otígi, apé sia'kí hi weeró noho nií! Yî'í âpiré uúkükã, kîí kê'ra ti'otígi, apé sia'kí hi weeró noho niísami. ¹² Tohóta nií' misã kê'rare. Misã Espírito Santo tutuaró me'ra wee masisé o'osére iá! Teeré iarã, a'teré iãri peha yî'ri ni'kaya. Jesu Cristore êho peóri kurakâharãre nemoró âyuró êho peókã wee masise pe'ere iãri peha yî'ri ni'kaya.

¹³ Tohó weerã no'ó apêyere masítimigi uúkûgi noho teé uúküsere werê turia masiakíhi Ô'âkî hire sêriãto. ¹⁴ Marí apêye uúküsere ti'otímirá Ô'âkî hire sêrírã, Espírito Santo wee tamúse me'ra sêrî! Tohó weemíã, "A'tíro niíãrã weé", nií masitisa! Tohó weerã âpêrãre wee tamúti boosa! ¹⁵ Marí Ô'âkî hire sêrírã, a'té piãrore weeró iá! Apêyere masítimirá uúküse Espírito Santo o'osé me'ra Ô'âkî hire sêríró iá! Tohó niikã marí wãkusé me'ra kîí re sêríró iá! Apêye kê'rare Ô'âkî hire basã peorã, meharóta piãro me'ra basã peoro iá! taha. Apêyere masítimirá uúküse me'ra, tohó niikã marí uúküse iseri me'ra basaró iá! ¹⁶ Apêyere masítimirá uúküse me'ra di'akí mi'í Ô'âkî hire "Áyú" niikã, âpi mi'í uúküsere ti'otí boosami. Ti'otígi, "Tohóta nií", nií tamu masitisami. ¹⁷ Mi'í Ô'âkî hire "Áyú" niikã, âyú nií! Kîí pe'ere Ô'âkî hire nemoró êho peókã weetisa! ¹⁸ Apêyere masítimigi uúküsere yî'íta misã niî pe'tirã nemoró uúkû yî'ri ni'ka! Tohó weégi Ô'âkî hire "Áyú" nií! ¹⁹ Tohó niímigi, Jesu Cristore êho peorã nerê wiaropi misã ti'otísere uúkükã, yî'í uúküse wapa marísa! Yoakã apêye uúküse me'ra uúkümigi, mehó waro uúkû boosa! Misã ti'otí boosa! Kã'roákã niímikã, masã ti'otã basióse me'ra uúkükã pe'ere, teetã misãre âyú nií!

²⁰ Akawerãrã, Jesu Cristore êho peorãre misãre werêgiti. Wi'marã ti'o masítima. Naã weeró noho wãkütikã'ya. Bikírã weeró noho wãkusétiya. Wi'marã yã'ãro weesétitirã weeró noho wãkúya. ²¹ Ô'âkî hi yee kiti ohãka pûripi a'tíro ohã no'okaro niíwi: "Marí wiôgi Ô'âkî hi a'tíro niíki niíwi: 'Êho peótise bu'iri yî'í a'tí di'takãharãre apêye uúküse me'ra uúkûgiti. Tohó weemíkã, teé me'ra kê'rare êho peósomé, niíki niíwi.'" ²² Tohó weégi Ô'âkî hi masaré apêye uúküse me'ra werêgi, masã êho peótisere, kîí re yî'í

ni'kasere i'ayosamí. Āpêrā kīîre êho peórā pe'ere kīi yeé kiti wererá me'ra yi'îre êho peórā niîma niisere i'ayosamí.

²³ Misâ niî pe'tirā nerê wiaropi apêye uúkũsere ti'o masítimirá uúkũkã, Jesu Cristore êho peótirã sãháa boosama. Naâ sãha ehárã, misâ uúkũsere masítirã, “Maatihírã weemá”, niî boosama. ²⁴ Misâ niî pe'tirã Ô'ákĩ hi werê'kere werê turiakã pe'e maa, a'tĩro wee boosama. Jesu Cristore êho peótigi misâ weesére i'ÿagi, “Yi'î yã'agí niísa”, niî ti'ó yã'a boosami. ²⁵ Kĩî yã'áro weê'kere wákũ ehagisami. Tohô weégi Ô'ákĩ hire êho peógi ehã ke'agisami. “Ô'ákĩ hi diakĩ híta naâ me'ra niîmi”, niigisami.

Misâ weesére wio pesáse me'ra weeyá niisê niî'

²⁶ Akawerérã, misâ weesétise a'tĩro niî'. Misâ nerêrã, apêrã Ô'ákĩ hire basã peosama. Āpêrã Ô'ákĩ hi yeekãhasere bu'êsama. Āpêrã Ô'ákĩ hi masikã weê'kere werê turiasama. Āpêrã, apêye uúkũsere ti'otímira, uúkũsama. Naâ uúkũsere apêrã ou naâ basi werê turiasama. Teé me'ra niî pe'tirã Jesu Cristore êho peóri kurakãharãre a'mêri Ô'ákĩ hire êho peó nemokã weeyá. ²⁷ Apêye uúkũsere ti'otímira uúkũrã piárã ou i'tiárãta uúkũato. Ni'kí uúkũ mi'ta, be'ró apí uúkũato. Naâ uúkũsere apí werê turiato. ²⁸ Misâ nerê wiaropi werê turiagi marikã, uúkũti yi'riokã'ato. Naâ se'saro wãkusépi Ô'ákĩ hire uúkũato. ²⁹ Ô'ákĩ hi werê dutisere werê turiarã kê'ra piárã ou i'tiárãta wereáto. Āpêrã naâ weresére beseáto. “Diakĩ híta niíti?” niíato. ³⁰ Ni'kí uúkũri kura Ô'ákĩ hi apí toopí duhigire werê dutikã, uúkũ mi'ta'ki di'ta mariáto. ³¹ Misâ niî pe'tirã Ô'ákĩ hi werê duti'kere werê turia masi'. Tohô weérã ni'kí werê mi'ta, apí, apí werê turia wãkaya. Tohô weekã, niî pe'tirã masírãsama. Niî pe'tirã wákũ tutuarãsama. ³² Misâ Ô'ákĩ hi werê dutisere werê turiarã, no'ó iaró uúkũ ma'atikã'ya. Wákũ yuu, “A'tetã masaré werekã, áyú ti'sa!”, niî werêya. Āpêrã uúkũri kurare uúkũtikã'ya. ³³ Ô'ákĩ hi keoró weekã iamí. No'ó iaró weesére iatími.

Niî pe'tirã Jesu Cristore êho peórã nerêrã, a'tĩro wee wiãma. ³⁴ Misâ nererí kurare numiã uúkũti yi'riokã'ato. Naãre uúkũ dutitikã'ya. Uúkũro noho o'drã, Ô'ákĩ hi yee kiti ohãka pũripi duti'karo nohota áyuró yi'tiáto. ³⁵ Naâ ti'otí'kere masí si'rírã, wi'lipí naâ marapí simiare sêri yã'ato.

Numiã Jesu Cristore êho peórã nerê wiaropi uúkũkã, ti'sã wee'.

³⁶ Misãre masiró iá!. Ô'ákĩ hi yee kiti misã me'ra ni'katfkaró niíwi. Misã se'saro teeré êho peórã nií wee!. ³⁷ No'ó “Yi'î Ô'ákĩ hi yeere werê turia masi', Espírito Santo wãkusé o'osé me'ra uúkũ” niigí noho yi'î ohasére “Marí wiógi dutisé niî!”, niigisami. ³⁸ Yi'î ohã'kere êho peótigire misã kê'ra kīîre êho peótikã'ya.

³⁹ Akawerérã, Ô'ákĩ hi yeere werê turia masisere iayã. Āpêrãre apêye uúkũsere ti'otímira naâ uúkũkã, ka'mú ta'atikã'ya. ⁴⁰ Niî pe'tise misã weesére no'ó iaró weé ma'atikã'ya. Wio pesáse me'ra weeyá.

Jesu Cristo masá'ke niî'

15 Akawerérã, yi'î misãre too dipóropi bu'ê'ke Jesu Cristo masaré yi'rióse kitire ni'kãroakã wãkukã iá!. Misã teeré ti'órã, êho peówi. A'tóka tero kê'rare êho peó nu'ku!. ² Ô'ákĩ hi teé áyusé kiti me'ra misãre êho peó nu'kukã weégi weemí. Misãre tee kití yi'î werê'kere êho peó nu'kukã, yi'riógisami. Keoró misã êho peókã, tohô weegísami. Misã keoró êho peótirã, yi'rió no'osome.

³Yi'f re bu'ê'kere misäre werê turiawi. Teé apêye yi'rióro nií yi'ri ni'kase a'tíro niíwi. Ô'âkî hi yee kiti ohâka pûripi ohâ'karo nohota Cristo marí yâ'âro weé'kere kô'â sí'rigi, wêrí basaki niíwi. ⁴Kîí wêrika be'ro kîíre yaákârâ niíwâ. Be'ró Ô'âkî hi yee kiti ohâka pûripi ohâ'karo nohota i'tiá nimi be'ro Ô'âkî hi kîíre masóki niíwî. ⁵Tohó weéka be'ro kîí Pedroe, âpêrá kîí bese kúú'kârâre bahuáki niíwî. ⁶Be'ró ni'kâti pâharâ quinientos yi'rióro kîíre êho peórâre bahuáki niíwî. Pâharâ kîíre î'yâ'kârâ katisama yuhûpi. Âpêrá wêría tohakârâ niíwâ. ⁷Be'ró Tiagore bahuáki niíwî. Toó be'ro nií pe'tirá kîí bese kúú'kârâre bahuáki niíwî.

⁸Be'ró nií pe'tirá kîíre î'yâka be'ropi yi'f re bahuáwî. Naâ be'ro êho peó siru tuugi, wi'magi keoró bahuáti'ki weeró noho tí'ó yâ'a. ⁹Yi'f nií pe'tirá âpêrá Jesu Cristo bese kúú'kârâ dokapi nií'. Yi'f re neé kâ'ró “Jesu Cristo bese kúú'ki niími”, niítikâ'ro íá'. Yi'f Jesu Cristore êho peóri kurakâharâre yâ'âro weé'ke bu'iri, tohó nií'. ¹⁰Tohó niímigi, Ô'âkî hi yi'f re âyuró wee yuúká, Jesu Cristo bese kúú'ki nií'. Yi'f re mehó waro âyuró weégi weetími. Yi'f nií pe'tirá âpêrá yi'rióro da'rá'. Yi'f se'saro tohó weé wee'. Ô'âkî hi yi'f re âyuró weégi, yi'f me'ra nií nu'kumi. Yi'f re wee tamúmi. ¹¹Yi'f bu'esé, tohó niiká âpêrá kîí bese kúú'kârâ naâ bu'esé ni'kâro noho nií'. Jesu Cristo wêrí masá'ke kiti ísâ bu'esé nií'. A'teréta misâ êho peówi.

Wêrí'kârâ naâ masa miháatehe nií'

¹²Ísâ Cristo wêrí masá'ke kitire bu'êwi. Teeré bu'êmikâ, de'ró weérâ misâ ni'karêrá “Wêrí'kârâ masatíma”, niísari? ¹³“Wêrí'kârâ masatíma” niiká maa, Cristo kê'ra masatí boopí. ¹⁴Kîí masatíkâ maa, ísâ bu'esé wapa marí boopâ. Misâ êho peóse kê'ra wapa marí boopâ. ¹⁵Ô'âkî hi Cristore masóki niíwî niisé kitire werêwi. Misâ “Wêrí'kârâ masatíma” niiká, ísâ tee kitíre werêrá, nií soorâ wee boósa!. Diakí híta wêrí'kârâ masatíkâ maa, Ô'âkî hi Cristore masotí boopí. ¹⁶A'tíro nií'. Wêrí'kârâ masatíkâ maa, Cristo kê'ra masatí boopí. ¹⁷Kîíre masotíkâ, misâ êho peóse wapa marí boosa!. Too dipóro misâ yâ'âro weé'kere meharóta akobohó no'otirá nií boosa!. ¹⁸Jesu Cristore kîí pakí masotíkâ maa, kîíre êho peórâ wêrîrá, kîíre êho peótirá weeró noho pekâ me'epi wa'â boosama. ¹⁹“Wêrí'kârâ masasomé” niisé diakí hí niiká maa, marí “Masarásama” niírá, maríta âpêrá yi'rióro pahasé kiorâ waro nií boosa!. Mehó waro êho peó ma'a boosa!.

²⁰“Wêrí'kârâ masatíma” niisé diakí hí nií wee!. “Cristo masáki niíwi” niisé pe'e diakí hí nií!. Cristo âpêrá nií pe'tirá wêrí'kârâ diporo masá mi'taki niíwî. Marí kê'ra wêrí'kârâpi masarása!. ²¹A'tíro nií!. Neé warokí hipi Adão yâ'âro weé ni'ka'ke bu'iri marí nií pe'tirá wêrí diharása!. Be'ró Cristo âyuró weesé me'ra wêrí'kârâpi niímîrá, masa mihárasa! taha. ²²Marí nií pe'tirá Adão p'ra niisé bu'iri wêrîrasa!. Cristo yarâ niírá pe'e marí kîíre êho peórâ, katí nu'kurása!. ²³Marí masará, keoró masarása!. Cristo masá mi'ta tohaki niíwî. Be'ró kîí opâturi a'tiká, marí kîí yarâ masarása!. ²⁴Tohó wa'aká, a'ti ímí koho pe'tiá wa'ârosa!. Tiítare Cristo nií pe'tirá wiôrá tutuarâre, bahutîrâre, baturâre kô'â pe'okí 'sami. Kîí tohó weé tu'a ehaka be'ro kîí pakiré kîí nií pe'tirá wiôgi niisére wiagísami. ²⁵Tohó wiaátoho diporo Ô'âkî hi Cristore î'yâ tu'tirâre dokâ ke'akâ weegísami. Tohó weégi Cristo nií pe'tirá bu'ipi tohagísami. ²⁶Cristore î'yâ tu'tirâre dokâ ke'akâ weéka be'ro wêrisé kê'ra maríroosa!. ²⁷Ô'âkî hi kîí yeé kiti ohâka pûripi níro nohota nií pe'tisere, nií pe'tirâre Cristo dokapi

tohaká weéki niŵi. Tohô niŵo, “Ô'ákî hi Cristo dokapi niŵi”, niŵo meheta weé! Ô'ákî hita niŵ pe'tisere, niŵ pe'tiräre Cristo dokapi tohaká weéki niŵi. ²⁸ Ô'ákî hi tohô tohaká weéka be'ro Cristo Ô'ákî hi maki, kîî basi kîî paki doká tohagísami. Tohô weégi Ô'ákî hi niŵ pe'tise, niŵ pe'tirä wiôgi niŵisami.

²⁹ Apêyere âpêrâ a'tŵo weesamá. Wêrî'kâräre wamê yee basa dutisama. “Wêrî'kârâ masatísama” niiká maa, tohô weetí boosama.

³⁰ Apêyere, îsâ bu'esé bu'iri niŵ pe'tise niŵiri âpêrâ îsäre yâ'âro weé si'rima. Tohô wiosé wa'teropi niŵimîrâ, wêrî'kârâ masaátehere wâkûrâ, bu'ê nu'ku'. ³¹ Diakî hita yî'î misâ marî wiôgi Jesu Cristore êho peóse bu'iri e'katí! A'té kê'ra diakî hita niŵ! Niŵ pe'tise niŵiri “Masá yî'î re wêherásama”, niŵ ti'ó yâ'a'. ³² Yî'î Jesu Cristo yee kitire weresé bu'iri Éfesokâharâ yî'î re wa'îkîrâ yaiwa weeró noho yâ'âro weewá. “Wêrî'kârâ masasomé” niiká, mehô waro naâ weesére pi'etí boopâ. “Wêrî'kârâ masasomé” niisê diakî hí niiká maa, marî kê'ra âpêrâ uúku wiaro noho uúku boosa! A'tŵo niŵ boosa! “Te'á ba'ârâ, te'á si'rirâ. Maatâ wêrî diharâsa! Marî wêriátotoho diporo tohô weé we'orâ”, niŵ boosa!

³³ Âpêrâ misâre mehêkâ êho peó dutikâ, êho peótikâ'ya. Masá uúku wiase a'tŵo niŵ! “Yâ'arâ me'ra ba'pâtikâ, âyuró weesé dohósa!” ³⁴ Tohô weérâ ti'ó masíya. Misâ too dipóro niŵ'karo noho wio pesáse me'ra keoró weeyá taha. Yâ'âro weetikâ'ya. Ni'karérâ Ô'ákî hire masí weé! Misâre bopôya dutigi tohô niŵ!

Wêrî'kârâ masa miháatehere werê nemose niŵ

³⁵ Apé tero ni'kî “Wêrî'kârâ masatíma” niisére êho peógi, a'tŵo sêri yâ'a boosami: “Wêrî'kârâ de'ró weé masa boósari? Naâ masará, de'ró bahurí ipi kiorásari?” ³⁶ Kîî tohô sêri yâ'a ma'akâ' boosami. Marî otesé bahuri oteká, tee peéri pi'riátotoho diporo boâ dihasa! ³⁷ Marî otêrâ pi'ri mihá'kipi mehereta otê! Tee peéri pe'ere trigo ou no'ó otesé niisére pi'ri dutirâ otê! ³⁸ Be'ró Ô'ákî hi kîî íá'karo noho pi'riká weesamí. No'ó de'ró bahusé dika niŵ'ke tee nohóta taha pi'riká weesamí. ³⁹ Niŵ pe'tirâ katisére kiorá ni'kâro noho bahurá niŵtima. Masa yeé ipi wa'îkîrâ yaa ipi weeró noho bahú weé! Mirikî hiá yaa ipi kê'ra mehêkâ bahú! Wa'î kê'ra mehêkâ ipítima. ⁴⁰ A'té dika watŵo weeró noho i'mîsekâharâ kê'ra mehêkâ ipítima. A'tí di'takâharâ mehêkâ ipítima. I'mîsepi niirâ âyú butia'ri ipi kiomá. A'ti nukúkâpi niirâ kê'ra tohóta kiomá. I'mîsekâharâ, a'ti nukúkâkâharâ weeró noho niŵtima. ⁴¹ Muhîpû imî kohokî hi yamîkî hi weeró noho, tohô niiká yôkoá weeró noho bo'rê yuutimi. Yôkoá kê'ra ni'kâro noho bo'rê yuutisama. ⁴² Á'râ niŵ pe'tirâ weeró noho wêrî'kârâ masaká, wa'ârosa! Wêrî'kâräre yaaká, naâ ipí boârosa! Be'ró ape ipí pe'titiátihî ipi masó no'orosa! Masóka be'ro opâturi wêrî nemosome. ⁴³ Marî mehô niirí ipire yaá! Masarópia taha ape ipí âyú butia'ri ipi niírosa! Marî tutuâtiri ipire yaá kô'a! Masáka be'ropire ape ipí tutuarí ipi niírosa! ⁴⁴ Marî a'ti ipire yaá kô'a! Masáka be'ro i'mîsekâha ipi pe'titiátihî ipi niírosa! Tohô weérâ masí no'ó! Marî a'ti ipire kiórâ, ape ipí pe'titiátihî ipire kiorása!

⁴⁵ Ô'ákî hi yee kiti ohâka pûripi a'tŵo ohâ no'ó: “Ô'ákî hi kîî weé mi'ta'ki Adôore katisére o'ôki niŵi.” Kîî be'rokî hi Jesu Cristo pe'le katisé pe'titísere o'ogí niŵi. ⁴⁶ A'ti ipí kâhase katisé marî kió mi'tase niŵ! Apêye katisé be'rokâhase niŵ! Teé i'mîsekâha ipikâhase pe'titiátehe niŵ! ⁴⁷ A'ti nukúkâpire masí niŵ mi'ta'ki di'tâ me'ra yeé no'ókî niŵi. Kîî be'rokî hi

Cristo i'mîsekî hi niîmi. ⁴⁸A'tí di'takâharâ neê warokî hi di'tâ me'ra weê no'o'ki weeró noho ipitîma. Jesu Cristore êho peórâ pe'e i'mîsepi wa'aáhâ i'mîsekî hi weeró noho ipitîma. ⁴⁹Adão di'tâ me'ra yeê no'o'ki niîwî. Marî kîî weeró noho ipitî! Meharóta be'ropí i'mîsekî hi Cristo weeró noho ipitîrâsa!.

⁵⁰Akawerêrâ, a'tîro niî'. Marîre a'ti ipí me'ra i'mîsepi wa'âta basió wee! Boâ dihaatihi ipi niî'. Tii ipí niî nu'ku masitisa! ⁵¹⁻⁵²Apêye kê'ra too dipóro masí no'oya marí'kere werêgiti. Niî pe'tirâ wêrisome. Jesu Cristo a'tirí kura Ô'âkî hire werê ko'tegi i'mîsekî hi Ô'âkî hi yaro coronetare putigísami. Tohó wa'aká, imí yaro me'ra kapêrire bi'á keheo' pââ keheo'ro weeró noho marí niî pe'tirâ Jesu Cristore êho peórâ ape ipí dika yuúrâsa! Wêrî'kârâ ape ipí pe'titiátihi ipi me'ra masarásama. Katirâ kê'ra meharóta dika yuúrâsama. ⁵³Mari yaá ipi boâ wiari ipi pe'titiátihi ipi wa'ârosa! Dika yuú, katí nu'kukâ'rosa! ⁵⁴⁻⁵⁵Marí pe'titiátihi ipi dika yuúkâ, Ô'âkî hi yee kiti ohâka pûripí niiró nohota wa'ârosa! A'tîro niî ohâ no'o': "Marí wêrisére dokâ ke'akâ weé toha! Neê opâturi wêrî nemosome maha. Wêrirâ pi'etísome." ⁵⁶Marí yâ'âro weesé bu'iri wêrî! Teé marí yâ'âro weesére Ô'âkî hi Moisére dutisé kûú'ke me'ra masí no'o! Yâ'âro weérâ, marí pekâ me'epi wa'â boopâ. ⁵⁷Teeré ka'mú ta'agi, Ô'âkî hi pe'e a'tîro weéki niîwî. Marí wiôgi Jesu Cristo me'ra pekâ me'epi wa'â boo'kârâre yî'rióki niîwî. Tohó weérâ Ô'âkî hire "Áyú!" niîrâ.

⁵⁸Akawerêrâ, a'terê wâkûrâ, êho peó nu'kukâ'ya. Marí wiôgi yeere siâpe me'ra nemoró wee nemóya. Misâ masí! Kîi yeére weérâ, tohó weé ma'akâ'râ meheta weé! Wapatí!

Corintokâharâ Jerusalépi niirâre niyéru o'ôratirâ sêri neéose niî'

16 Misâ Jesu Cristore êho peórâre niyéru sêri neéose maa yî'f Galáciakâharâre dutí'karo nohota weeyá. A'tîro niîwî: ²"Soorí nimire niî mi'tari nîmi semanari niki misâ wapá ta'aro ehâ tu'aro apé sia'pi ni'roya." Misâ tohó wee yuúrâ, yî'f etarí kurapi o'ô sî'rîrâ da'râ ma'a kúyasome. ³Yî'f misâ tiropí etâgi, misâ beserâre Jerusalépi o'ôo'giti. Naâre o'ôo'gi, yî'f ohâka pûripire "Á'râ niîma Corintokâharâ besé'kârâ", niî ohâgiti. Naâ me'ra tii pûrîre, tohó niiká niyérure Jerusalé kâharâ Jesu Cristore êho peórâre o'ôo'giti. ⁴"Yî'f re wa'aró iá!" niiká maa, naâ yî'f me'ra wa'ârasama.

Paulo Corintopí kîî wa'aátehere apo yuúse niî'

⁵Yî'f toopí wa'âgi, Macedônia di'tapi yî'riágisa! Toó yî'riáa, misâ tiropí etâgisa! ⁶Apé tero weégi misâ me'ra yoaká niígisa! Niî pe'tiropi pu'êki niígi, niî pe'okí 'sa! Be'ró, misâ apêro no'ó yî'f wa'â sî'rîgi wa'aátehere wee tamú masirâsa! ⁷Yî'f misâre tohó waro i'lyâ yî'ri wâ'ka sî'ritisa! Marí wiôgi Jesu Cristo iaká, misâ tiropire yoaká tohá sî'risa! ⁸Pentecoste bosê nîmi niiká a'tó Éfesopi niî ni'ligiti yuhûpi. ⁹A'toré pehé da'rasé niî! Pâharâ marí wiôgi yee kitire ti'ó sî'rima. Teeré ka'mú ta'a sî'rîrâ kê'ra pâharâ niîma.

¹⁰Timóteo misâ tiropí etaká, kîî re wee tamúya. Tohó weeká, kîî wâkû ke'tiropi mariró, bihá wetiropi mariró niígisami. Kîî yî'f weeró noho marí wiôgi yeere da'ramí. ¹¹Tohó weérâ misâ kîî re ayuró yê'êya. Kîî a'topí a'tiátehere wee tamúya. Tohó weeká, kîî e'katíse me'ra yî'f tiropi a'tigísami. Yî'f âpêrâ Jesu Cristore êho peórâ me'ra kîî re yuú kuegi weé!

¹² Apolo maa yi'í ipíti waro misâ tiropi i'yâgi wa'â dutimiwi. Kîîre marí akawerérâ me'ra wa'â dutimiwi. Kîî ni'kâroakâre wa'â sî'ritimi. Kîîre wa'âta basiókâ, be'rô wa'âgisami.

Paulo Corintokâharâre âyu dutí tio'ke nií'

¹³ Misâ âyuró ti'o masíya. Êho peó du'utikâ'ya. Neê uiró mariró niíya. Tohô niírâ, Ô'âkî hi tutuasé me'ra niíya. ¹⁴ Âpêrâre ma'í nu'kukâ'ya.

¹⁵ Ni'kâroakâre, akawerérâ, a'teré misâre weré sî'risa'. Estéfana yaá wi'ikâharâta niíwâ Acaiapire âpêrâ diporo Jesu Cristore êho peó mi'ta'kârâ. Naâ Jesu Cristore êho peórâre ipíti waro wee tamúma.

¹⁶ Naâ weeró noho weesétirâ nohore naâ dutisére yi'tiyá. Tohô niiká nií pe'tirâ Cristo yeere da'rará naâ dutisére weeyá. ¹⁷ Misâ me'rakâharâ Estéfana, Fortunato, Acaico a'topí ehaká, pûuro e'katíwi. Naâ misâ yi'íre wee tamú boo'kere weemá. ¹⁸ Yi'íre âyuró ehêri pō'ratikâ weewá. Misâ kê'rare tohōta weerásama. Tohô weerâre “Âyuró weérâ weemá”, niiró iá'.

¹⁹ Ásia di'takâharâ Jesu Cristore êho peóri kurakâharâ misâre âyu dutíma. Áquila, Priscila, naa yaá wi'ipi nerê wiarâ kê'ra Jesu Cristore êho peórâ nií tîharâ, pûuro âyu dutí o'oma. ²⁰ Nií pe'tirâ Jesu Cristore êho peórâ misâre âyu dutíma. Misâ ma'isé me'ra a'mêri pōo tēriya.

²¹ A'té nií tiose daaripire misâre âyu dutígi yi'í basita ohâ'.

²² No'ó marí wiôgi Jesu Cristore ma'itígire yâ'âro wa'aáto. “Ísâ wiôgi, keêro a'tí bakeo'ya.”

²³ Jesu Cristo marí wiôgi misâre âyuró weeáto. ²⁴ Marí nií pe'tirâ Jesu Cristo yarâ nií'. Tohô weégi misâre ipíti ma'í'. Tohōta wa'aáto.

Toô kâ'rota ohâ'.

Paulo